

129

HARVARD COLLEGE LIBRARY  
FROM THE  
HARVARD-YENCHING  
INSTITUTE

OCT 1 1940

~~Ch L 9297.74~~

~~Ch L 9301.74~~

Ch L<sup>R</sup> 9297/1184

册府元龜



淮南李嗣京叅閱

西極文翔鳳訂正

豫章黃國琦較釋

貢舉部

三

條制第三

唐文宗太和元年七月勅今年權於東都置舉其明  
經進士任使東都赴集其上都國子監舉人合在上  
都試及節目未盡者委條流聞奏

八月禮部貢院奏東都置舉條件其上都國子監宗

九  
條制三  
正寺鴻臚寺舉人並請待東都考試畢却迴就上都  
考試從之

十月中書門下奏應禮部諸色科目選人等凡未有  
出身未有官如有文學只合於禮部應舉有出身有  
官合於吏部赴科目選近年以來格文差互多有白  
身及用散試官并稱鄉貢者並赴科目選及注擬之  
特卽妄論資次魯無格例有司不知所守其宏詞拔  
萃學究一經則有定制然亦請不在用散試官限其  
二禮三傳一史三史明習律令等如白身並令國子  
監及州府同明經一史三禮三傳同進士三史當年

關送吏部便授第二任官如有出身及有正員官本  
是吏部常選人則任於吏部不限選數應科目選三  
史則超一資授官如制舉人既諸色人中皆得選試  
則無出身官人並可亦請不用散試官從之

是月京兆府鄉貢明經孫延嗣等三百人進狀舉大  
曆六年七年例請同國子監生上都考試許之

二年十二月禮部貢院奏五經明經舉人試義請准  
元和十四年十一月四日勅以墨義代口義許之

三年八月禮部奏進士舉人先試帖經并畧問大義  
取經義精通者次試議論各一首文理高者便與及

第其所試詩賦並停者伏請帖大經各十帖通五通  
六爲及格所問大義便於習大經內准格明經例問  
十條仍對衆試口義伏惟新制進士畧啓大義緣初  
釐革今且以通三通四爲格明年以後並依明經例  
其所試議論請各限五百字以上成勅旨依奏

四年十月中書門下奏應開元禮學究一經二禮三  
史明習律令科人等准太和元年十月二十三日勅  
散試官及白身人並於禮部考試其有出身及有官  
人並吏部科目選者凡是科目本合在吏部試自分  
兩處考試每處皆別與人數轉多事理非便臣等商  
量坐舊前吏部收試其諸節目並准太和元年十月  
二十三日勅處分從之

七年八月制公卿士族子弟明年已後不先入國學  
習業不在應明經進士之限其進士舉宜先試帖經  
并畧問大義取經義精通者次試議論各一道文理  
高者便與及第所試詩賦並停其試帖官便以國子  
監學官充禮部不得別更奏請弘文崇文兩館生齋  
郎並依令試經畢仍差都省郎官兩人覆試須責保  
任不得輒許替代

八年正月禮部奏明經弘文崇文館生太廟郊神齋

郎掌坐等共五百五十二人今六色共請減一百三十八人從之

是月禮部侍郎李漢奏准太和七年八月勅貢舉人不要試詩賦策且先帖大經小經共二十帖次對正義十道次試議論各一首訖考覈放及第

是月中書門下奏進士放榜舊例禮部侍郎皆將及第人名先呈宰相然後放榜伏以委在有司固宜精慎宰臣先知取捨事匪至公今年已後請便令放榜不用先呈人名其及第人所試雜文及鄉貢三代名諱並當日送中書門下便令定例勅旨依奏

八月詔罷諸色選舉以歲旱故也

九月勅吏部禮部兵部今年選舉並緣秋末蟲旱相因恐致災荒權令停罷及歛藏之後物力且任念彼求名之人必懷觸望之念寧違我令以慰其心宜依嘗例却置應緣所納文狀及銓試等期限仍准今年格文遞延一月

十月禮部奏進士舉人自國初以來試詩賦帖經時務策五道中間或變改更旋卽仍舊蓋以成法可守所取得人故也去年八月節文先試帖經口義論議等以臣商量取其折衷伏請先試帖經通數依新格

處分時務策五道其中三道問經義兩道時務其餘並請准太和六年以前格處分勅旨依奏

九年十二月中書門下奏今月九日閣內面奉進止今條流進士人數及諸色人等進士元格不得過二十五人今請加至四十人明經元格不得過一百一十人今請減十人伏以國家取士遠法前代進士之科得人爲盛然於人仕湏更指撫必使練達固在經歷起來年進士及第後三年任選委吏部依資盡補州府叅軍緊縣簿尉官滿之後來年許選三考後聽諸使府奏用便入協律郎四衛佐未滿三考不在奏

改限如任江淮官特與勉其綱使又聞每年貢士嘗僅千人據格所取其數絕少強學待用嘗年不試孤貧介士老而無成甚可惜之臣等商量望付所司精求行藝起來年添滿四十人及第仍委禮部於所試諸色貢舉人元格數內共減一十五人都守每年放出身黃衣人數永爲定制編入嘗格庶令才人速得自効經於下位以致上達可之

開成元年正月詔文武之道合而兼濟勲臣子弟有能修詞務學應進士明經及通諸科者委有司先加獎引

州府元龜卷之三 雜考卷之四十一  
自其年至二年三年並高鍔知貢舉每年皆恩賜題  
目及第並四十人

二年五月禮部奏請每年進士以三十人爲限從之  
十二月詔諸道應薦萬言童子等朝廷設科取士門  
目至多有官者合詣吏曹未仕者卽歸禮部此外更  
或延引則爲冗長起今後不得更有聞薦俾繇正路

與絕倖門

雖是有命而以童子  
爲薦者比比有之

四年十月勅每年明經及第宜更與十人

武宗會昌三年正月勅禮部所放進士及第人數目  
今後但據才堪者卽與不要限人數每年止於十人

五人總得

是月宰臣李德裕等奏舊例進士未放榜前禮部侍  
郎遍到宰相私第先呈及第人名謂之呈榜比聞多  
有改換頗致流言宰相稍有寄情有司回無畏忌取  
士之濫莫不繇斯將務責成在於不撓旣無取舍豈  
必預知臣等商量今年便任有司放榜更不得先呈  
臣等仍向後便爲定例如有固違御史糾舉奏者其  
時有勅重試進士因栖靈塔災且止

四年二月權知貢舉左僕射判太常卿王起下及第  
二十五人續奏五人堪放及第楊質至竇緘楊嚴鄭

朴源重奉勅只放楊嚴及第餘並落下王起頃年知貢舉每貢院

考試訖上榜後更呈宰相取可否復人數不多宰相延英論言主司試藝不合取宰相與奪比來貢舉艱難放人絕少恐非引誘之道帝曰貢院不會我意不放子弟即太過無論子弟寒門但取實藝耳李德裕對曰鄭肅封敖有好子弟不敢應舉帝曰我北聞揚虞卿兄弟朋比貴勢妨平人道路昨楊知至鄭朴之徒並令落下卿其太甚耳德裕曰臣無名弟不合言進士之非然臣祖天寶末以仕進無地政勉強隨計一舉登第自不放私家置文選蓋惡其祖尚浮華不根藝實然朝廷顯官須是公卿子弟後者因小便宜舉業日熟朝廷問事臺閣儀範班行准則不教而自成寒士縱有出人之才登第之後始得一班一級固不能習熟也則子弟成名不可輕矣

十月中書門下奏朝廷設文學之利以求髦俊臺閣清選莫不繇茲近緣覈實不在於鄉閭趨名頗雜於

非類致有跋扈之地情計交通將澄化源在舉明憲臣等商量今日以後舉人於禮部納家狀後望依前三人自相保其衣冠則以親姻故舊久同遊處其有江湖之士則以封壤接近素所諳知者為保如有缺孝弟之行資朋黨之勢跡繇邪徑言涉多端者並不在此就仕之限如容情故自相隱蔽有人糾舉其同保人並三年不得赴舉仍委禮部明為戒勵編入舉格從之

五年三月中書門下奏貢舉人並不許於兩府取解仰於兩都國子監就試



宣宗大中元年正月禮部侍郎魏扶放及第二十二年續奏其放及第三人封彥卿崔琢鄭延休等皆以文藝爲衆所知其父皆在重任不敢選取其所試詩賦並封進奏進止令翰林學士戶部侍郎知制誥韋琮等考盡合程度其月二十五日奉進止并赴所司放及第有司考試只合在公如涉徇私自刑典從今以後但依嘗例取捨不得別有奏聞

是月勅自今放進士榜後杏園任依舊宴集所司不得禁制

六月中書門下奏貢舉人取解宜准舊條於京兆府河南府集試從之

十年四月禮部侍郎鄭顥進諸家科目記十一卷勅付翰林自今放榜後仰寫及第人姓名及所試詩賦題目進入內仍付所司逐年編次

五月中書門下奏據禮部貢院見置科目內開元禮三禮三傳三史學究道舉明筭明法童子等九科近年取人頗濫魯無實藝可採徒添入仕之門須議條流俾精事業臣等已於延英面論伏奉聖旨將文字來者其前件九科臣等商量望起大中十年權停三年滿後至時赴試者令有司據所與人先進名令中

州府元龜條制三  
卷之六十四十一  
書舍人重覆問過如有本業精通堪備朝廷顧問卽  
作等第進名候勅處分如事業荒蕪不合迭名數者  
考官當議朝責其童子近日諸道所薦送者多年尚  
已過僞稱童子考其所業又是嘗流起今已後望令  
天下州府薦送童子並須實年十一十二以下仍須  
精熟一經問全通兼自能書寫者如違制條本道長  
吏亦議懲罰從之

十二年三月中書舍人李潘知舉放博學宏辭科陳  
琬等三人及進詩賦論等召潘謂曰所賦詩中重用  
字何如潘曰錢起湘靈鼓瑟詩有重用字乃是庶幾  
帝曰此詩似不及起乃落下

十三年十二月河中節度使令狐綯以其子瀉求應  
進士舉勅曰令狐瀉多時舉人極有文學流輩所許  
合得科名比以父綯職在樞衡避嫌不赴今因出鎮  
却就舉場况諸通規合試至藝宜令主司准大中六  
年勅考試只在至公如涉徇情自有刑典從今已後  
但依嘗例放榜本司舉士貴在得人去留之間惟理  
所在

懿宗咸通十一年四月勅去年屬以用軍之際權停  
貢舉一年今旣偃戈却宜仍舊來年宜別許三十人

及第進士十人明經一十人已後不得援例

景宗天祐三年正月國子監奏得監生郭應圖等六  
十人狀稱伏覩今年六月五日勅文應國學與諸道  
等明經一例解送兩人者應圖等早辭耕稼夙慕詩  
書自拋鄉邑之中便忝國庠之內棲遲守學輒軻於  
時未蓄昇進之期却抱減退之患苟或諸道解送監  
府同條實謂首尾難分本校無異伏請聞奏俾遂渥  
恩者又河南府奏當府取解明經舉人周定言等二  
十七人各據取解差司錄叅軍崔蘊考試並已及格  
伏緣明經舉人先准勅諸州府解送不得過二人者

今當府除去留外見在二十七人考試並已及格若  
只送二人必恐互有爭論難以指揮者勅曰取士之  
科明經極重每年人數已有舊規去夏雖舉條流蓋  
慮所司踰濫今者國子監既有聞奏河南府亦具陳  
論不念遠人何以誘進只在乎升陟之際切務公平  
又何必解送之時便爲沙汰將免遺才之嘆須開汲  
善之門特改舊條俾循往例國子監河南府所試明  
經並依准嘗例解送禮部所放人數亦許酌量施行  
但不得苟徇囑求遂致僥倖兼下諸道准此

二月禮部奏伏以朝廷累年多事道途艱辛在遠舉

人併阻隨計逐年所司放榜人數不當量其少多臨事增減今者干戈稍弭水陸漸通舉人等皆負笈擔簦裂裳裹足來求試藝競切觀光雖人數不廣於近年而貢籍頗甚其屈譽至於俊造亦有其人臣今欲於去年數外更放三數人俾開勸誘之門以養文明之運已選今月二十一日放榜伏候進止者勅曰朝廷取士之科每歲擇才之重必資藝實以副勤求或來自遠途或久稽鄉薦今年就試多有屈人所司奏論是宜俞允苟叶無私之道俾開振滯之門切在精詳佇觀公當其禮部所放進士於舊年人數外宜令

史添兩人

梁太祖開平元年六月詔近年諸道貢舉人當藩方秋薦之時不親試者號爲拔解非所以責實也帝因知之乃下令止絕

三年勅條流禮部貢院每年放明經及第不得過二十人

四年十二月兵部尚書知貢舉姚洎奏曰近代設詞科選胄子蓋所以綱維名教崇樹邦本者也曩時進士不下千人嶺徼海隅偃風嚮化近歲觀光之士人數不多加以在位臣僚罕有子弟就其寡少復避嫌

疑實恐因循漸爲廢墜今在朝公卿親屬將相子孫有文行可取者請許所在州府薦送以廣毓才之義從之

乾化元年十二月以尚書左僕射楊涉知禮部貢舉非嘗例也前代自唐武德貞觀之後但委考功員外郎掌之至開元二十五年員外郎李昂爲貢士李權所誣繇是中書奏請以禮部侍郎專焉其間或以他官領者多用中書舍人及諸司四品清資官准會昌中命太嘗卿王起主貢舉時乃簡較僕射耳

後唐莊宗同光二年三月勅選舉二門仕進根本當掄擇於多士全委使於有司苟請託是從則踰濫斯極况方行公事已集羣材須行戒勵之文俾絕倖求之路宜令吏部禮部翰林考藝必盡於精詳減私徇公無從於請託仍委三銓貢院榜示省門曉告中外十月中書門下奏獻可効忠前經之令典因時建議有國之明規道旣務於化成事亦敷於競勸敢俾宸聽輒罄芻言伏惟陛下業茂經綸功成理定五材七德威冠於伐謀百氏三墳義彰於知敎爰自中興啓運下武膺期炤臨而日月光華鼓舞而乾坤交泰英明取士睿哲崇儒誠宜便廣於搜羅豈可尚令於濫

抑但以今春貢士就試不多卽日選人磨勘未畢宗伯莫臻於俊乂天官難辨於妍媸况已過秋期將行公事例間道路悉是家貧比及到京多踰程限文闈選部皆礙條流伏請權停貢選一年俟遷駑者更勵進脩希干祿者益加循省然後精求良幹博採畢能免有遺賢庶同樂聖勅舉選二門國朝重事俱要精確難議權停宜准嘗例處分

三年三月勅禮部貢院今年新及第進士符蒙正成僚王徹桑維翰四人國家歲命春官首司貢籍高懸科級明列等差廣進善之門爲取士之本所重者藝行兼著鄉里有稱定才實之淺深振聲名於夷夏必當得雋允副旁求爰自近年寢成澆俗多聞濫進全爽舊章朕自興復丕圖削平僞紀方作事以謀始盡革故以鼎新蓋欲窒弊正訛去華務實誠爲要道無切於斯今據禮部奏所放進士符蒙正等四人旣慊輿情頗干浮論湏令覆試俾塞羣言又遣考詳貴從精覈及再覽符蒙正成僚等呈試詩賦果有瑕疵今若便有去留慮乖激勸儻無昇降卽眈甄明况王徹體物可嘉屬辭甚妙細披製作最異儕流但應試以効成或求對而不切桑維翰若無紕繆稍有功夫止

當屬對之間累失求妍之美湏推事藝各定否臧貴  
叶允平庶諸公其其王徹改爲第一桑維翰第二符  
蒙正第三成僚第四禮部侍郎裴皞在掄材之際雖  
匪阿私當定名之時頗虧優劣但緣符蒙正等旣無  
絀落裴皞特議寬容勿負憂疑已從釋放自今後應  
禮部常年所試舉人雜文策等候過堂日委中書門  
下准本朝故事細加詳覆方可奏聞不得輒徇人情  
有隳事實時命盧質覆試於翰林院試君從諫則聖  
賦以堯舜禹湯傾心求過爲韻臣事君以忠詩是歲  
試進士科者數十人裴皞精選其文惟得王徹輩或  
譖毀於宣徽使李紹宏曰今年新進士不繇才進各  
有阿私物議以爲不可紹宏訴於郭崇韜因奏令盧  
質覆試質爲賦韻五平聲三側聲且踰常式覆試之  
日中外騰口議者非之

五月禮部貢院奏當司准流內銓牒應請定冬集舉  
人內有前鄉貢童子者三銓已前團奏冬集皆豎前  
鄉貢童子伏准格文只有童子科此無鄉貢字銓司  
先爲請定冬集舉人九經張仲宣等內有前鄉貢明  
經童子成光誨遂檢尋六典及蕪冕會要又無本朝  
書子細簡討惟有閏十三年十二月勅諸道應薦萬

言及童子起今後不得更有聞薦據此童子兩字皆由諸道表薦固無鄉貢之名又無口議帖經亦不合有明經之字進則止於暗誦便號神童此外格文別無童子其成光誨銓司准格只收豎前童子團奏去二月十五日具狀申留司宰臣取裁奏例准申者伏緣三銓見團奏冬集右內有鄉貢及明經字已依成光誨例准格只豎童子團奏次者左伏以院司嘗年考試皆憑諸道表薦降勅下到當司准格考試及格者便放及第其同光二年童子郭忠恕等九人皆是表薦童子勅內并納到家狀並有鄉貢兩字院司簡

勘同便榜示引試及第後先具白關牒報吏部南曹續便團奏春關奏狀下到中書省追當司元下納家狀檢點同覆奏放勅經過諸處勅下後方始到當司備錄黃關牒報御史臺尚書省并吏部南曹今在流內銓牒伏緣院司承前皆憑勅命施行童子勅內並有鄉貢兩字若使下落恐涉專擅者奉勅超今後宜准開成三年勅文凡有官者並詣吏曹未仕者皆歸禮部其童子則委本州府依諸色舉人例考試結解送省任稱鄉貢童子長吏不得表薦若無本處解送本司不在考試之限



八月勅條例諸道州府不得表薦童子

四年正月五科舉人許維岳等一百人進狀言伏見新定格文三禮三傳每科只放兩人方今三傳一科五十餘人三禮三十餘人三史學究一十人若每年止放兩人及一人逐年又添初舉縱謀修進皆恐滯留臣伏見長慶咸通年放舉人元無定式又同光元年春榜亦是一十三人請依此例以勸進修勅依同光元年例永爲嘗式

明宗天成元年八月勅應三京諸道今年貢舉人可依當年例取解仍令隨處津送赴闕

三年正月尚書禮部貢院奏五經考試官先在吏部日長定合請兩員數年係屬貢院准新定格文祇令奏請一員兼充考試伏緣今年科目人數轉多却欲依舊請考試官各壹員如蒙允許續具所請官名進御申奏奉勅宜依

是年四月中書奏禮部貢院申當司奉今月六日勅吏部流內銓狀申據白院狀申當司先准禮部貢院牒稱具成德軍解送到前進士王蟾狀請罷攝深州司功參軍應宏詞舉前件人准格例應重科合在吏部其王蟾并解送吏部請准例指縱者當司遂具狀

申堂奉判送吏部分折近年事例如何者伏緣近年別無事例今檢登科錄內於僞梁開平三年應宏詞登科二人前進士余渥承旨舍人李愚考官二人司勳郎中崔景兵部員外郎張貽憲者再具狀申堂奉判送吏部准例指揮者其前進士王蟾應宏詞考官試官合在流內銓申請者前進士王蟾請應宏詞伏自近年以來無人請應今詳格例合差考官二人又緣只有王蟾一人獨應銓司未敢懸便奏請差官者奉中書門下牒奏勅宜令禮部貢院就五科舉人考試者伏以舉選公事皆有格條准新定格勅文宏詞

拔率准長慶二年格吏部差考試官一、與知銓尚書侍郎同考試聞奏又准格節文內准大和元年十月二十三日勅應禮部諸色貢舉人及吏部諸色科目選人凡無出身及未有官只合於禮部應舉有出身有官方合於吏部赴科目選其請應宏詞舉前進士王蟾當司當年放及第後尋已開過吏部訖若應宏詞例待南曹判成卽是科選選人事理合歸吏部况緣五科考試官只考學業難於同考宏詞者奉勅王蟾宜令吏部准往例差官考試

十二月勅新及第進士有聞喜宴關晏逐年賜錢四

十萬

三年春趙鳳知貢舉場中利病備達天聽因勅進士帖經通三卽可五科試本業後對策全精卽可諸經學帖經及格後於大經洗問五義尚書於試紙令直解其理通三卽可對策並須理有指歸言關體要七月工部侍郎任贊上言曰伏以聖代設科貢闈取士必自鄉薦來觀國光將叶公平惟求藝行益廣搜羅之理且非喧競之場伏見嘗年舉人等省門開後春榜懸時所習旣未精妍有司寧免黜落或嫉其先達或恣以厚誣多集怨於通衢皆取駭於羣聽頗虧

教本却成亂階宜立新規以革前弊自今後諸舉人不是家在遠方水陸隔越者望本令各於本貫選藝精通賓寮一人考試如非通曉不許妄薦儻考覈必當卽試官請厚於甄酬若薦送稍私弁童子盡歸於竄逐異彰睿化免紊儒風庶絕濫進之人其守推公之道

是日勅宜令今後諸色舉人委逐道觀察使慎擇有詞藝及通經官員各據所業考試及格者卽與給解仍具所試詩賦經帖通精數一一申省未及格者不得徇私發解兼承前諸道舉人多於京兆府寄應例

以洪固鄉胃貴里爲戶一時不實久遠難明自此各  
於本道請解具言本州縣某鄉某里某爲戶如或寄  
應須具本貫屬入狀不得効洪固胃貴之例文解到  
省後據所稱貫屬州府戶籍內如是無名本人分給  
解處官吏必加罪責京百司發解就試准前指揮兼  
下貢院具本朝舊格諸色舉人每年各放幾人及第  
到日續更詳酌處分

是月勅應將來三傳三禮三史開元禮學究等考試  
本業畢後引試對策時宜令主司須於時務中採取  
要當策題精詳考校不必拘於對屬須有文章但能

周通文字典切卽放及第如不及此格雖本業精通  
亦須黜落應九經五經明經帖書及格後引試對義  
時宜令主司於大經汎出問義五通於簾下書於試  
紙令隔簾逐段解說但要不失疏注義理通二通三  
然後便令念疏如是熟卷並須全通仍無失錯始得  
入策亦須於時務中選策題精當考較如精於筆硯  
留意者得則以四六對仍須理有指歸言關體要如  
不魯於筆硯致功則許直書其事不得錯使文字只  
在明於利害其問義念疏對策逐件須有去留  
是月勅近年諸道解送童子皆越嘗規或年齒漸高

或精神非俊或道字頗多訛舛或念書不合格文主司若不去留貢部積成乖弊自此後應諸道州府如公然濫發文解畧不考選藝能其逐處判官及試官並加責罰仍下貢院將來諸道應解送到童子委主司精專考較須是年顏不高念書合格道字分明兼無廢失卽放及第仍依天成三年例主司未出院間便引就試與諸科舉人同日放榜不得前却

十二月戊午禮部貢院以諸色及第人失墜出身請同年一人充保次年及第二人充保卽重給春闈已未以近令進士帖經過三卽放慮非所知致今年令不及通三亦放來年秋賦詞人並令對義

四年二月貢院雖鎖未試舉人勅先往雒京赴本省就試

七月貢院奏今年諸色及第人中有人曾攝州縣官及有御署攝牒兼或有正授官及曾在賓幕赴舉者諸條格中書奏及第人先曾授職官者宜令所司於守攝文書內豎重任舉及第年月日或改名不改名分明印押懼其轉賜於人假資冒進也其中曾授正官御署弁佐幕者仍約前任資序與除一任官如自中興以來諸科及第人曾授職官者並令所司追給文

書到日准今年及第人例處分已授官者不在此限兼勒貢院將來舉人納家狀內各分折曾爲官及不曾爲官改名不改名其曾爲職官者先納歷任文書及第後准例指揮從之

是月勅應今年新及第人給春闕並於敷政門外宣賜慮所司邀頡故也

十月中書門下條流貢舉人事件應諸道州府解送諸色舉人須准元勅差有才藝公正官考試及格然可給解仍具所試詩賦義目帖繇送省如逐州府解與不豎出前件指揮事節所司不在引試之限禮部

貢院考試諸色帖經舉人今後據所業經書對義之時透經須將生卷與熟卷申半考試不得依往例只將熟卷試問今後主司不得受內外官察書題薦託舉人及安排考試官如或實講知有才學精博者任具奏聞若受書題囑託致有屈人其主司與發書人並加黜責其所舉人別行朝典三銓南曹亦不得受諸色官員書題薦託選人如違並准前指揮應諸色落第人此後所司具所落事繇別張懸文榜分明曉示除諸州府解送舉人外餘有於河南府寄應及宗正寺國子監生等亦須准上指揮其中有依託朝臣

者於解內具言在某官某姓名門館考試及第後並據姓名覆試諸色舉人至入試之時前五日內據所納到試紙本司印署訖却送中書門下取中書省印印過却付司給散逐人就試貢院合請考官試官今後選舉業精通庶慎有官者充人在朝臣門館人不得奏請奏勅宜依

是月兵部尚書盧質奏請逐年諸色貢舉人州府取解之時選強明官考試具詩賦義自送省從之

五年正月禮部貢院奏當司准天成三年十二月十

八日勅文內准近勅自此進士試雜文後據所習

經一一考試須帖得通三已上卽放及第者奉勅進

士帖經本朝舊制蓋欲明先王之旨趣潤才子之文章近代以來此道稍墜今且上從元輔下及庶寮雖負藝者極多能帖經者甚少恐此一節或滯群材既求備以斯難庶觀光而是廣今年凡應進士舉所試文策及格帖經或不及通三與放及第來年秋賦詞人所習一大經許令對義義目多少次第仍委所司付奏者其今年逐處所解送到進士當司引試雜文帖經後欲令別於所習一大經內對義目五道考試通二通三准帖經例於其入策其將來秋賦諸寺監

及諸道州府所解送進士等亦准去年十月一日勅  
條流考試其詩賦義目帖出等解送赴省如或不依  
此解送當司准近勅並不引試奉勅

冊府元龜

淮南李嗣京參閱

西極文翔鳳訂正

豫章黃國琦較釋

貢舉部

條制第四

後唐明宗長興元年二月勅傳科不精公穀虛有其  
名禮科未達周儀如何登第兼知前後空聞定制去  
留皆在終場博通者混雜以進身庸淺者僥求而望  
事須頒明勅俾叶公途自此後貢院應試三傳三禮



宜令准進士九經五經明經例逐場皆須去留不得  
候終場方定仍具所通否粗一一旋於榜內告示其  
學究不在念書可特示墨義三十道亦准上指揮如  
此則人知激勸事有區分主司免致於繁冗舉子不  
與於僭濫仍所司學究不念書新例也國朝所設五  
科唯學究文書最少乃令念其經而通其義故曰學  
究今稭許對義郎學者皆專於此科時論非之

五月勅宏詞拔萃明筭道舉百篇等科並宜停廢

六月中書門下奏勅新及第進士所試新文委中書  
門下細覽詳覆方具奏聞不得輒徇人情有墮事體

中書於今年四月二十九日帖貢院准元勅指揮中

書量重具詳覆者李飛賦內三處犯韻李穀一處犯

韻兼詩內錯書青字爲清字並以詞翰可嘉望特恕

此誤今後舉人詞賦屬對並須要切或有犯韻及諸

雜違格不得放及第仍望付翰林別撰律詩賦各一

首具體式一一曉示將來舉人合作者郎與及第其

李飛樊吉夏侯琪吳油王德柔李穀等六人盧價賦

內薄伐字合使平聲字今使側聲字犯格孫澄賦內

御字韻使字字已落韻又使裔字是上聲有字韻中

押售字是去聲又有朽字犯韻詩內田字犯韻李象

賦內一句六石慶芳並合使此奚字道之以禮合使此導字及錯下事嘗字韻內使方字詩中言十千十字處合使平聲字偏字犯韻楊文龜賦內均字韻內使民字以君上爲驂駢之士失奉上之體兼善字是上聲合押偏字是去聲如字內使輿字詩中偏字犯韻師均賦內仁字犯韻晏如書晏如又河清海晏晏字不合韻又無理晏字卽落韻楊仁遠賦內賞罰字書伐字銜勤字書鍼字詩內蓮蒲字合着平聲字兼黍梁不律王谷賦內御字韻押處字上聲則落韻去聲則失理善字韻內使顯字犯韻如字韻押殊字落

韻其虛價等七人望許令將來就試仍放再取文解高策賦內於字韻內使依字疑其海外音訛文意稍可矜特恕此其鄭朴賦內言臄股詩中十千字犯韻又言王珠其鄭朴許令將來就試亦放取解仍自此資貢每年祗放一人仍須事藝精奇張文寶試士不得精當矜罰一季俸今後知舉官如敢因循當行嚴典伏以國設高科人貪上第所望不小其業須精實以喪亂年多苦辛人少半失宣尼之道倍勞宗伯之心不望超羣且須合格今逢聖運大闡皇猷設官共革於時詵選士實期於歲勝又朝廷較藝爲擇賢或

臣下收恩豈成公道時論以貢舉官爲丘門恩門及以登第爲門生門生者門弟子也顏閔游夏等並受仲尼之訓卽是師門大朝所命春官不魯教誨舉子舉子是國家貢士非宗伯門徒况又斥先聖之名失爲儒之體今後及第人放勝時並須據才藝高低從上依次第安排不得以隻科取鼎島岳斗之名爲貴與從敦實以息浮澆兼不得呼春官爲恩門師門不得自稱門生除賜宴外不得輒有率歛別謀歡會曾赴舉落第人無故不得改名將來舉人並依據地理遠近於十月三旬下納文解如違不在收受之限勅旨從之

七月比部員外郎知制誥崔稅奏臣伏見開元五年勅每年貢舉人見訖宜令引就國子監謁先師學官爲之開講質疑所司設食求爲嘗式自經多故其禮寢停請舉舊典從之

八月勅其童子准往例委諸道表薦不得解送兼所司每年所放不得過拾人仍所念書並須是部帙正經不得以諸雜零碎文書虛成卷數兼及第後十一選集第一任未得授親人官

是月勅今後吏部所應宏詞拔萃宜並權停其貢院

據見應進士九經五經明經並五科童子名外其餘諸色科名亦宜並停

十二月每年貢舉人所試詩賦多不依體式中書奏請下翰林院命學士撰詩賦各一首下貢院以爲舉人模式學士院奏伏以體物緣情文士各推其工拙論材較藝詞場素有其規程凡務策名合遵嘗式况聖君御宇興學盈朝儻令明示其規模或慮衆貽其臧否歷代作者垂範相傳將期絕彼微瑕未若舉其舊制伏乞下所司依詩格賦樞考試進士庶令職分互展恪勤從之

二年二月禮部貢院奏當司奉堂帖夜試進士有何條格者勅旨秋來赴舉備有嘗程夜後爲文曾無舊制王道以明規是設公事須白晝顯行興盛觀光猶敦勸善每取翰林學士往例皆試五題共觀筆下摘詞不俟燭前構思其進士並令排門齊入就試至明開時試畢內有先了者上曆晝時旋令先出其入策亦須晝試應諸科對策並依此例餘准前後勅格處分夜試進士非前例也

六月刑部員外郎和凝奏臣竊見明法一科久無人應今應令請減其選限必當漸舉人謹按考課令諸

明法試律令十條以識達義理問無疑滯者為通所  
貴懸科待士自勤講學之功為官擇人終免曠遺之  
咎况當明代宜舉此科勅旨宜升明法一科開同元  
禮選數兼赴舉之時委貢院別奏請會刑法試官依  
格例考試 先是天咸三年十一月權判大理寺蕭希甫上言曰臣聞禁暴亂者莫先於刑律勤禮義者無切於詩書刑律明則人不敢為非禮義行則時自然無事今詩書之教則業必有官刑律之科則世皆莫曉近者大理正宋昇請置律學生徒雖獲上聞未蒙申舉伏乞時頒詔旨下付國庠令再設此科許其歲貢仍委諸州各薦送一兩人就京習學候至業成便放出身兼許以卑官却還本處則率士之內盡會刑書免誤觸於金科與咸遵於皇化至是凝復奏請

三年正月詔曰貢舉之人辛勤頗甚每年隨計終日

食貧湏寬獎勸之門俾釋羈縻之歎今後落第舉人所司已納家狀者次年便付所司就試並免再取文解兼下納文解之時不在拘以三旬但十月內到者並與收受

十二月禮部貢院奏准會要長壽二年七月十日左拾遺劉承慶上疏曰伏見比年已來天下諸州所貢方物至元日皆陳在御前惟貢人獨於朝堂列拜伏請貢人至元日列在方物之前以備充廷之禮制曰可近年直至臨鑠院前赴應天門外朝見今後請令舉人復赴正仗仍緣今歲已晚貢士未齊欲且據見

到入點引牒送四方館至元日請令通事舍人一員引押朝賀列在貢物之前或以人數不少卽請祇取諸科解頭一人就列其餘續到者候齊日別令朝見如蒙允許當司卽於都省點別習儀奉勅宜准元勅處分餘宜依

四年二月知貢舉和凝奏舉人就試日請皇城司差人於院門前聽察舉人挾帶文書入院請殿將來舉數自一舉至三舉放榜後及第人看榜訖便綴行於五鳳樓前謝恩後赴國學謝先師舊例侵星張榜訖貢舉考試官便出院蓋恐人榜下誼訴今年請放榜

後貢舉官已下至晚出勅旨五鳳樓前非舉子謝恩之所令於朝堂謝訖卽赴國學試日宜令御史臺差人院司聽察放榜日至晚出院此後永爲定制餘並依奏

是月禮部貢院奏新立條件一九經五經明經呈帖經之時試官書通不後有不及格者唱落後請置筆硯將所納由分明却令自看或是試官錯書通不當與改正如懷疑者使許請本經書面前檢對如實是錯誤卽更於帖上書名而退一五科常年駁榜出多稱屈塞今年並明書所對經書墨義云第幾道不第

幾道粗第幾道通任將本經書疏炤證如考試官錯書不粗請別將狀陳訴當再加考較如實錯誤妄陳文狀當行嚴斷一今年舉人有抱屈落第者許將狀披訴貢院當與重試如貢院不理卽詣御史臺論訴請自試舉人日令御史臺差人受舉人訴屈文狀并引本身勘問所論事件或知貢舉官及考試官已下取受貨賂昇擢親情屈塞藝能應副囑託及不依格去留一事有違請行朝典一懷挾書策舊例禁止請自今年後入省門搜得文書者不計多少准例扶出殿將來一舉上鋪後搜得文書者准例扶出殿將來

兩舉一遙口授人廻授試處及抄義題帖書時諸般相救准例扶出請殿將來三舉一自是藝業未精准格落下出外及見駿榜後羞見同人妄扇屈聲擬爲將來基址及別人帖對過場數多者便生誣玷墜陷或羅織毆罵者並當收禁榜送御史臺請賜勘窮如知貢舉官及考試官事涉徇私屈塞藝士請行朝典若虛妄者請痛行科斷牒送本道重處色役仍永不得入舉場同保人亦請連坐各殿三舉奉勅宜依三月童子闈惟一等三十九人進狀伏見貢院榜童子祇放十人乞念苦辛更加人數勅旨都收二十人

須是實苦辛者仍此後不得援

末帝清泰元年九月中書門下帖太嘗以長興三年  
勅諸科舉人嘗年薦送先令行鄉飲酒之禮凡預舉  
人列從鄉賦遂奏鹿鳴之什俾騰龍化之津雅音既  
動於笙簧厚禮復陳於筐筥行茲盛事克振儒風宜  
令復行鄉飲酒之禮太嘗草定儀注頒下諸州預前  
肄習解送舉人之時便行此禮其儀遠具聞奏時李  
懌爲太嘗文士淺於禮學唯博士段顥據禮記賓主  
次第申初長興中宰臣李愚好古奏行此禮累年不  
暇至是愚復舉奏及觀禮官所定無緒禮直官孫知  
訓以爲古禮無次序不可施行博士或言於愚曰梁  
朝時青州曾行一度遂令青州放舊簿書以聞

二年七月御史中丞盧損言天成二年二月勅每年  
進士合有闈喜宴春闈宴并有司所出春闈牒用綾  
紙並官給臣等以舉人既成名第宴席所費屬私况  
國用未克枉有勞費請依舊制不賜詔曰春闈冬集  
綾紙闈喜闈宴所賜錢並仍舊官給餘從之

九月禮部貢院言選制勅內該合行二十五道理有  
未盡條例長興四年詔明經對墨義已前無此條例  
清泰二年二月詔明經念疏每問三道後許請熟卷



都問十道通六部放入策天成五年二月詔學究不  
念書試墨義三十道清泰二年三月詔學究依舊念  
書并注十道後別試墨義十道及格卽放入策

長興二年二月詔進士引試早入試晚出者今請依  
舊例進士試雜文並點門入省經宿就徃例童子表  
薦不解送每年所放不過十人長興四年三月詔許  
放二十人應順元年正月詔許放十五人今請如最  
後勅人數長興元年詔進士九經五經明經五科童  
子外諸色科目並停緣舊有明筭道舉今欲施行長  
興二年正月詔每年落第舉人免取文解今欲依元

格諸科並再取解以十月一十五日到省畢違限不  
收以天成四年詔諸色舉人入試前五日納試紙用  
中書省印訖付貢院院司緣五科所試場數極多旋  
用紙鑲宿內中書徃來不便請祇用當司印從之  
其月舉人張洞而下以去年落第人各於鄉里取解  
以試期近來徃不及乞今年且徇舊例從之來年卽  
勒本州取解

三年五月明經崔貺等經中書訴宋州節度掌書計  
上封事貢舉人須依舊格取本州里文解者見附國  
子監諸生赴舉皆不取文解條例異同詔曰凡布化

條惟務均一苟公平之無爽卽中外以適從國子監  
每舉舉人皆自四方來集不詢解送何辨是非其附  
監舉人並依去年八月一日勅湏取本處文解如不  
及第者次年便許監司解送若初投名未嘗令本處  
取解者初舉落第後監司勿更收補其淮南江南黔  
蜀遠人卽不拘此例監生禮部補令式在焉

晉高祖天福三年三月翰林學士承旨兵部侍郎權  
知貢舉崔棄奏臣謬蒙眷渥叨掌文衡實憂庸懦之  
材不副搜羅之旨敢不揣摩頑鈍絕杜阿私上則顯  
陛下求賢次則使平人得路但以今年就舉比常歲

倍多科目之中克豪甚衆每駁勝出後則時有喧張  
不自省循但言屈塞互相朋扇各出言詞或云主司  
不公或云試官受賂實慮上達聖聽微臣無以自明  
晝省夜思臨深履薄今臣欲請令舉人落第之後或  
不甘心任自投狀披陳却請所試與疏義對證兼令  
其日一甲同共較量若獨委試官恐未息詞理儻是  
實負抑屈則所司固難追憲章如其妄有陳論則舉  
人乞痛加懲斷與此際免虛遭謗議亦將來可遠从  
施行儻蒙聖造允俞伏乞降勅處分從之

四年六月勅尚書禮部歷代懸科爲時取士任使貴

期於稱職搜羅每慮於遺才其如銓司注官員闕有  
誤貢闈考第人數不啻雖大朝務廣於選求而嘗調  
頗聞於淹滯每候一闕或經累年遂令羈旅之人多  
起怨咨之論將令通濟湏識從權庶幾進取之流更  
勵專勤之業其貢舉公事宜權停一年  
五年三月詔及第舉人與主司選勝筵宴及中書舍  
人鞞鞋接見舉人兼兵部禮部引人過堂之日幕次  
酒食會客悉宜廢之

四月禮部侍郎張允奏曰明君側席雖切旁求貢士  
觀光豈宜濫進竊窺前代未設諸科始以明經俾昇  
高第自有九經五經之後及三禮三傳已來孝廉之  
科遂因循而不廢縉紳之士亦緘默而無言以至相  
承未能改作每歲明經一科少至五百已上多及一  
千有餘舉人如是繁多試官豈能精當况此等多不  
究義唯攻帖書文理既不甚通各第豈可妄與且當  
年登科者不少相次起選者甚多州縣之間必無貢  
闈輦轂之下湏有稽留怨嗟自此而興謗讟因茲而  
起但令廣場大啓諸科並有明經者悉包於九經五  
經之中無出於三禮三傳之內若無釐革恐未便宜  
其明經一科伏請停廢又奏國家懸科待士貴務搜

揚責實求才須除訛濫童子每當就試止在念書背經則雖似精詳對卷則不能讀誦及名成貢院身返故鄉但刻日以取官更無心而習業濫蠲徭役虛占官名其童子一科亦請停廢勅明經童子宏詞拔萃明筭道舉百篇等科並停

六年五月勅明法一科今後宜令五選集合格注官因仍優與處分

少帝開運元年八月詔曰明經童子之科前代所設蓋期取士良謂通規爰自近年暫從停廢損益之機未見牢籠之義全虧將闡斯文宜依舊貫庶臻至理用廣旁求其明經童子一科今後復置

十一月工部尚書權知貢舉竇貞固奏進士考試雜文及與諸科舉人入策歷代已來皆以三條燭盡爲限長興二年改令晝試伏以懸科取士有國嘗規沿革之道雖殊公共之情難失若使就試兩廊之下揮毫短景之中視晷刻而惟畏稽遲演詞藻而難求妍麗未見觀光之美但同欵答之由旣非師古之規恐失取人之道今於考試之時准舊例以三條燭爲限其進士并諸色舉貢人等有懷藏書冊入院者舊例扶出不令就試近年以來雖見懷藏多是容縱今欲

振舉弛紊明辨臧否與在必行庶為定式  
十二月勅禮部貢院自前考試進士皆以三條燭為  
限并諸色舉人等有懷藏書冊不令就試宜並准舊  
施行從竇貞固奏也

漢隱帝乾祐二年刑部侍郎邊歸謹上言臣竊見每  
年貢舉人數甚眾動應五舉六舉多至二千三千既  
事業不精即人文何取請勅三京鄴都就道州府長  
官合發諸色貢舉人文解者並須精加考較事業精  
研即得解送不得濫有舉送與塞濫進之門開與能  
之路勅從之其間條奏未盡處下貢院錄天福五年

四月二十七日勅文告諭天下依元勅條件施行如  
有故違其隨處考試官員當准勅條處分

周太祖廣順三年二月禮部侍郎趙上交奏貢院諸  
科今欲不試泛義口義共十五道改試墨義共十一  
道從之

三年正月戶部侍郎權知貢院趙上交奏九經舉人  
元帖經一百二十帖墨義三十道臣今欲罷帖經於  
諸經對墨義一百五十道五經元帖八十帖墨義二  
十道今欲罷帖經令對墨義一百道明經元帖書五  
十帖今欲罷帖書令對義五十道明法元帖律令各

十帖義二十道今欲罷帖律令對義二十道學究元  
念書二十道對義二十道今欲罷念書對義五十道  
三禮元對墨義九十道三傳元對義一百一十道欲  
三禮於周禮儀禮各添義二十道三傳於公羊穀梁  
傳各添義二十道開元禮三史元義三百道欲各添  
義五十道進士元添試詩賦各一首帖書二十帖對  
義五道欲罷帖書別試雜文二首試策並仍舊童子  
元念書一十四道欲添念通前五十道念及三十道  
者放及第從之

九月翰林學士承旨刑部侍郎知制誥權知貢舉徐  
合符奏貢舉之司條貫之道有沿有革或否或臧蓋  
趣向之不同致施行之有異今欲酌其近例按彼舊  
規參而用之從其可者謹條如右九經元格帖經一  
百二十帖對墨義汎義口義共六十道策五道去年  
知舉趙上交起請罷帖書汎義口義都對墨義一百  
五十道合今請去汎義口義都對墨義六十道其帖  
書對策依元格五經元格帖書八十帖對墨義五十  
道臣今請對墨義十五道其帖書對策依元格明法  
元格帖律令一十帖對律令墨義二十道策試十條  
去年罷帖對墨義六十道策試如舊臣今請並依元

格學究元格念書對墨義各二十道策五道去年罷  
念書都對墨義五十道今請依去年起請三禮元格  
對墨義九十道去年添四十道臣今請並依元格三  
傳元格對墨義一百一十道去年對四十道臣今請  
並依元格開元禮三史元格各對墨義三百道策五  
道去年加對五十道臣今請並依元格進士試雜文  
詩賦帖經二十帖對墨義五道去年代帖經對義別  
試雜文二首臣今請依起請別試雜文其帖書對義  
請依元格童子元格念書二十四道起請添念書都  
五十道及三十通者放臣請依起請勅國家開仕進  
之路設儒學之科較業掄才登賢舉俊其或藝能素  
淺履行無聞來造科場要求僥倖及當試落便起怨  
嗟謗議沸騰是非蜂起至有僞造制勅之語扇惑儕  
流巧爲誣毀之言隱藏名姓以茲取事得非薄徒宜  
立憲章以示澄汰其禮部貢院條奏宜依仍於引試  
之時精詳考校逐場去留無藝者雖應年深不得饒  
僭場數若有藝者雖當黜落並許訴陳祇不得於街  
市省門故爲喧競及投無名文字訕毀主司如有故  
違必行嚴斷本司鑠宿後御史臺開封府所差守當  
人專切覺察其有不自苦辛祇憑勢援潛求薦託俯

拾科名致使孤寒滯於進取起今後主司不得受薦  
託書題如有書題密具姓名聞奏其舉人不得就試  
今後舉人須取本鄉貫文解若鄉貫阻隔祇許兩京  
給解

世宗顯德元年十一月勅國子監所解送廣順三年  
已前監生人數宜令禮部貢院收納文解其今年內  
新收補監生祇仰落下今後須是監中受業方得准  
令式收補解送先是國學收補監生顯有條例邇來  
學官因循多有近甸州府不得解者卽投監請補送  
省率以爲嘗是歲主文者知其弊因取監司所送學  
生七十四人狀事詳之例不合於令式悉不收試由  
是移刺紛紜更相援引監司舉奏東修之條以塞其  
議貢院告於執政因達於上聽故降是命議者非成  
均而是禮闈

二年三月勅尚書禮部貢院奏今年新及第進士李  
覃嚴說何曦武允成王汾閻立舜卿楊徵之任惟吉  
趙隣幾周度張慎微王翥馬文劉選程浩然李震等  
一十六人所試詩賦文論策文等國家設貢舉之司  
求英俊之士務詢文行方中科名比聞近年以來多  
有濫進或以年勞而得第或因媒勢以出身今歲所



放舉人試令看驗果然紕繆須至去留其李覃何曦  
楊徽之趙隣幾等四人宜放及第其嚴諠武元成王  
汾閻丘舜卿任惟吉周度張愼微王翥馬支劉選程  
浩然李震等一十二人藝學未精並宜乞落且令苦  
學以俟再來禮部侍郎劉溫叟失於選士頗屬因循  
據其過尤合行譴謫尚示寬恕別具條理聞奏

五月翰林學士尙書禮部侍郎知貢舉竇儀上言伏  
以朝廷設科比來取藝州府貢士祇合薦能爰因近  
年頗隳舊制其舉子之弊也多是纔謀習業便切干  
周儀未詳赴三禮之舉公毅不究應三傳之科經

學則偏試帖由進士則鮮通經義取解之處請張妄  
說於辛勤到京之時奔競惟求於薦託其舉送之弊  
也多是明知荒淺具委克寵新差考試之官利其情  
禮之物雖所取無幾實啓幸非輕凡對問題任從同  
議謾鑿通而鑿否了無去以無留惟徇人情僅同兒  
戲致令至時就試不下三千每歲登科罕踰一百假  
使無添而漸放約須畢世而方周乃知難其舉則至  
公而有益於人易其來則小惠而無實於事有益者  
知濫進不得必致精勤無實者欲多放無能虛令來  
往且明經所業包在諸科近間應者漸多其研精者

益少又今之童子比號神童既幼稚之年稟神異之性語言辨慧精采英奇出於自然有則可舉竊聞近日實異於斯抑嬉戲之心教念誦之語斷其日月委以師資限隔而游思不容仆跌而痛楚多及孩童之意本未有知父母之情恐或不忍而復省試之際歲數難知或念誦分明則年貌稍過或年貌適中則念誦未精及有司之去留多家人之訴訟伏况晉朝之日罷此三科年代非遙勅又見在今宜釐革別俾進修臣謬以非才獲承此任本重難而為最復遺闕以州仍虔奉勅文重令條奏或從長而仍舊亦因弊以

改為上副聖情廣遵公道除依舊格勅施行外其明經童子請却依晉天福五年勅停罷任改就別科赴舉其進士請今後省卷限納五卷已上於中須有詩賦論各一卷餘外雜文詞篇並許同納祇不得有神道碑誌文之類其帖經對義並須實考通三已上為合格將來却復畫試候考試終場其不及第人以文藝優劣定為五等取文字乖舛詞理紕繆最甚者為第五等殿五舉其次者為第四等殿三舉以次稍優者為第三第二第一等並許次年赴舉三禮請今後解試省試第一場禮記第二場周禮第三場儀禮二

傳第一場左氏第二場公羊第三場穀梁並終而復始學究請今後周易尚書併爲一科每經對墨義三十道仍問經考試毛詩依舊爲一科對墨義六十道及第後請並咸爲上選集諸科舉人所對策問或不應問曰詞理乖錯者並當駁落其諸科舉人請第一場十否者殿五舉第二場三場十否者殿三舉其三場內有九否者並殿一舉其進士及諸科所殿舉數並於所試卷子上朱書封送中書門下請行指揮及罪發解試官監官等其監官試官如受取解人情禮財物請今後並准在法贓論又進士以德行爲基文章爲業苟容欺詐何稱科名近年場中多有詐僞託他人之述作竊自己之聲光用此面欺將爲身計宜加條約以誠輕浮今後如有倩人述作文字應舉者許人告言送本處色役永不得仕進又切覽唐書見穆宗朝禮部侍郎王起奏所試貢舉人試訖申送中書候覆訖下當司然後大字放榜是時從之臣欲請將來考試及第進士先具姓名雜文申送中書奏覆訖下當司與諸科一齊放榜詔並從之唯進士并諸科舉人放榜一依舊施行

四年冬十月詔曰制策懸科前朝盛事莫不訪賢良

於側陋求讜正於箴規殿庭之間帝王親試其或大禪於國政有益於時機則必待以優恩縻之好爵拔竒取異無尚於茲得人者昌於是乎在爰從近代久廢此科懷才抱器者鬱而不伸隱耀韜光者晦而莫出遂使翹翹之楚多致於棄捐皎皎之駒莫就於縻繫遺才滯用闕孰甚焉應天下諸色人有賢良方正能直言極諫經學優深可爲師法詳閑吏理達於教化等者不限前資見任職官黃衣草澤並許應詔其逐處州府依每年貢舉人式例差官別考試解送尙書吏部仍量試策論三道共三千字已上當日內成取文理俱優人物爽秀者方得解送取來年十月集上都其登朝官亦許上表自舉時兵部尙書張昭條奏請興制舉故有是詔

五年三月詔曰比者以近年貢舉頗是因循頗詔有司精加試練所與去留無濫優劣昭然昨據貢院奏今年新及第進士等所試文字或有否臧爰命詞臣再令考覆庶涇渭之不雜兔玉石之相參其劉垣戴貽慶李頌徐緯張觀等詩賦稍優宜放及第王汾據其文字亦未精當念以湏臾剝落特與成名熊若谷陳保衡皆是遠人深可嗟念亦放及第郭峻趙保雍

楊丹安玄度張昉董咸則杜思道等未甚苦辛並從  
 退落更宜修進以俟將來知貢院右諫議大夫劉濤  
 選士不當有失用心可責授右贊善大夫俾令省過  
 以誠當官先是濤於東京放榜後率新及第進士劉  
 坦已下一十五人來赴行在以其所試詩  
 賦進呈上以其詞紙繆命翰  
 林學士李昉覆試故有是命  
 六年正月壬子對諸道貢舉人石熙載等三百餘人  
 於萬春殿舊例每歲舉人皆見於閣門外上以優待  
 儒者故允其入見

甲戌詔曰起今後每年新及第進士及諸科舉人聞  
 喜宴宜令宣徽院指揮排比先是禮部每年及第人  
 聞喜宴皆自相釀飲以備焉帝以優待賢雋故有是

命

乙亥詔曰禮部貢院起今後應合及第舉人委知舉  
 官依逐科等第定人數姓名并所試文字聞奏候勅  
 下後放榜

卷之六十四

册府元龜

淮南李嗣京叅閱

西極文翔鳳訂正

豫章黃國琦較釋

貢舉部

五

考試

夫人君之有區宇也不可以獨治必求賢以共之賢士之懷德業也不可以自進必待君以任之所以舉善急賢前古之明訓檢才考藝有國之大方唐虞之際於斯為盛漢魏之下可得而論納敷奏之言則衆

善必舉下賢良之詔則羣才競進經濟之業斯備甲  
乙之科乃懸以至較藝實之精微察器識之優異授  
之王爵任以民政郡國以康風俗以化得人之效於  
斯可見求賢之道百世可知

漢文帝十五年詔有司舉賢良文學士帝親策詔之

臣欲若等日凡判策有對者並具貢  
舉對策門其史不對者即錄於此

武帝元光元年五月詔賢良曰朕聞昔在唐虞畫象

而民不犯二帝但畫衣冠異章服而民不敢犯也白  
虎通云畫象者其衣服象五刑也犯墨者

蒙巾犯劓者以赭着其衣犯髡者以墨蒙其鬢象而  
畫之犯宮者扉犯大辟者布衣無領墨謂以墨點其  
面也劓截其鼻也髡去膝蓋骨也宮割其陰也扉單  
覆也劓音牛冀切字或作劓其音同耳髡音煩忍切

罪音扶  
味切日月所燭莫不率俾燭炤也率循也俾使也  
言皆循其貢職而可使

也周之成康刑措不用措置也音  
一故切德及鳥獸教通四

海海外肅眷東夷今挹婁地是也在天余之東北千  
餘里大海之濱周書序云成王既伐東

夷肅眷來  
賓即謂此北發渠搜禹貢折支渠搜屬雍州在金城  
河關之西西戎也地理志朔方

有渠搜縣孔子三朝記云北發渠搜有撫交趾此舉  
北以南為對也禹貢渠搜在雍州西北渠搜在朔方

氏羗徠服徠古徃來之字  
也氏音丁奚切星辰不孛日月不蝕山陵

不摧川谷不塞麟鳳在郊藪河雒出圖書鳴虩何道

而臻此與虩音讀  
日呼今朕獲奉宗廟夙興以求夜寐以思

若涉淵冰未知所濟猗與偉與與讀日歟  
音弋於切何行而可

以章先帝之洪業休德上參堯舜下配三王朕之不

敏不能遠德言德不及遠也此子大夫之所睹聞也睹古賢

良明於古今王事之體受策察問咸以書對著之於

篇篇謂竹簡朕親覽焉於是董仲舒公孫弘等出焉

後漢光武建武十九年巡狩汝南召掾史試經郡小

吏周防猶能誦讀拜為守丞

順帝陽嘉元年七月丙辰以太學新成試明經下第

者補弟子增甲乙科員各十人除郡國耆儒九十人

補郎舍人

二年有地動山崩火災之異公卿舉李固對策陽嘉二年

詔公卿舉敦朴之士衛尉賈逵舉固也詔又特問當世之弊為政所宜

質帝本初元年四月令郡國舉明經年五十以上七

十以下詣太學自大將軍至六百石皆遣子受業歲

滿課試以高第五人補郎中次五人太子舍人千石

六百石四府掾屬三署郎四姓小侯先能通經者各

令隨家法四府掾屬諸大將軍掾屬二十九人太尉府掾屬二十四人司徒府三十一人司空

府二十九人漢官左右中郎將皆秦官也北二千石

三署郎皆屬焉三署謂五官署左右署也儒生為詩

者謂之詩家禮者謂之禮家故言其高第者上名牒

當以資賞進

靈帝熹平五年十二月試太學生年六十以上百餘人除郎中太子舍人至王家郎郡國文學吏



獻帝初平四年九月試儒生四十餘人上第賜位郎  
 中次太子舍人下第者罷之詔曰孔子歎學之不講  
 不講則所識日忘今耆儒年踰六十去離本土營求  
 糧資不得專業結童入學白首空歸長委農野永絕  
 榮望朕甚愍焉其依科罷者聽為太子舍人  
時長安官中為  
 之謹日頭白皓然食不充糲裹衣囊裳當還故  
 鄉聖主愍念悉用補郎舍是布衣被服玄黃  
 晉武帝泰始中詔天下舉賢良直言之士濟陰太守  
 文立舉郤詵應選詔曰蓋太上以德撫時易簡無文  
 至於三代禮樂大備制度彌繁文質之變其理何由  
 虞夏之際聖明接踵而損益不同周道既衰仲尼猶

曰從周因革之宜又何殊也先王既沒遺制猶存  
 者迭興而翼輔之王道之缺其無補乎何凌遲之不  
 及也豈霸德之淺期運不可致歟且夷吾之智而功  
 止於霸何哉夫昔人之為政革亂亡之弊建不刊之  
 統移風易俗刑措不用豈非化之盛歟何修而嚮茲  
 朕獲承祖宗之休烈於茲七載而人未服訓政道固  
 述以古况今何不相逮之遠也雖明之弗及猶思羣  
 賢慮之將何以辨所聞之疑昧獲至論於讜言乎如  
 頃戎狄內侵災害屢作邊鄙流離征夫苦役豈政刑  
 之謬將有司非其任歟各悉乃心究而論之上明古

制下切當今朕之失德所宜振補其正議無隱將敬聽之

擊虞舉賢良與夏侯湛等十七人策爲下第拜中郎  
武帝詔曰省諸賢良答策雖所言殊塗皆明於王義  
有益政道欲詳覽其對究觀賢士大夫用心因詔諸  
賢良方正直言會東堂策問曰頃日蝕正陽水旱爲  
災將何所修以變大眚及法令有不宜於今爲公私  
所患苦者皆何事凡平世在於得才得才者亦借耳  
目以聽察若有文武器能有益於時務而未見申叙  
者各舉其人及有負俗謗議宜見洗濯者亦各言之

阮种察孝廉爲公府掾是時西虜內侵災青屢見百  
姓饑饉詔王公卿尹嘗伯牧守各舉賢良方正直言  
之士於是太保何曾舉种賢良策曰在昔哲王承大  
之序先宅宇宙咸用規矩乾坤惠康品類林風流衍  
瀾於千載朕應踐洪運統位七載於今矣惟德弗嗣  
不明於政宵興惕厲未燭厥猷子大夫韞韜道術儼  
然而進朕甚嘉焉其各悉乃心以闡喻朕志深陳王  
道之本勿有所隱朕虛心以覽焉种對曰夫天地設  
位聖人成能王道至深所以行化至遠故能開物成  
務而功業不匱近無不服德逮羣生澤被區宇聲施

施無窮而典垂百代故經曰聖人久於其道而天下化成宜師蹤往代襲迹三五矯世更俗以從人望令率土遷義下知所適播醇美之化杜邪枉之路斯試羣黎之所欣想盛德而幸望休風也又問政刑不宣禮樂不立又問咎徵作見又問經化之務又問將使武成七德文濟九功何路而臻於茲凡厥庶事曷後曷先

華譚廣陵人太康中徐州刺史嵇紹舉譚秀才譚至維陽武帝親策之曰今四海一統萬里同風天下有道莫斯之盛然北有未羈之虜西有醜施之氏故謀夫未得高枕邊人未獲晏然將何以長弭斯患混淆六合又策曰吳蜀恃險今旣蕩平蜀人服化無携貳之心而吳人趨睢屢作妖寇豈蜀人敦樸易可化誘吳人輕銳難安易動乎今將欲綏靜新附何以爲先又策曰昔帝舜以二人成功文王以多士興周夫制化在於得人而賢才難得今大統始同宜搜才實州郡有貢薦之舉猶未獲出羣卓越之倫將時無其人而有而致之未得其理也

卓爲湘州刺史中興初以邊寇未靜學較陵遲特聽不試孝廉而猶依舊策試卓上疏以爲答問損益

當慎博通古今明達政體必求諸墳索乃堪其舉臣  
所忝州徃遭寇亂學較久替人士流播不得比之餘  
州策試之繇當藉學功謂宜同孝廉例繇與限期疏  
奏朝議不許卓於是精加隱括備禮舉桂陽毅儉為  
秀才儉辭不獲命州厚禮遣之諸州秀才聞當考試  
皆憚不行唯儉一人到臺遂不復策試儉取其州少  
士乃表求試以高第除中郎

宋高祖永初二年二月車駕幸延賢堂策試諸州郡  
秀才孝廉揚州秀才顧練豫州秀才殷郎所對稱旨  
並以爲著作佐郎

南齊武帝永明四年車駕幸中堂策秀才  
梁威袞年十九武帝勅策孔子正言并周禮禮記義  
袞對高第乃除揚州祭酒從事謝幾卿超宗之子召  
補國子生齊文惠太子自臨策試謂祭酒王儉曰幾  
卿本長玄理今可以義訪之儉承旨發問幾卿隨事  
辨對辭無滯者文惠大稱賞焉儉謂人曰謝超宗爲  
不死矣

後魏孝文太和十六年正月帝臨思議殿策問秀才  
北齊正會日侍中黃門宣詔勞諸郡上計勞訖付紙  
遣陳土宜字有脫誤者呼起席後止書迹濫劣者飲

墨水一升文理孟浪無可取者奪容才及席既而本  
曹郎中考其文迹才辭可取者錄牒吏部簡用流外  
三品叙

武成帝河清二年正月帝詔臨堂策試秀才

馬敬德河間人也以好儒術河間郡王每於教學追  
之將舉爲孝廉固辭不就乃詣州求秀才例取文士  
州將以其純儒無意推薦敬德請試方畧乃策問之  
所答五條皆有文理乃欣然舉送至京依秀才策問  
十條並通擢授國子助教遷太學博士

隋房暉遠爲國子博士間皇中文帝令國子生通一  
經者並悉薦舉將擢用之旣策問訖博士不能的定  
臧否祭酒元善恠問之暉遠曰江南河北義例不同  
博士不能遍涉學生皆持其所短稱其所長博士各  
自疑所以久而不決也祭酒因令暉遠考定之暉遠  
覽畢便下初無疑滯或有不服者暉遠問其所傳義  
疏輒爲始末誦之然後出其所短自是無敢飾非者  
所試四五百人數目便決諸儒莫不推其通博皆自  
以爲不能測也

杜正玄開皇末舉秀才尚書試方畧正玄應對如響  
下筆成章僕射楊素負才傲物正玄抗詞酬對無所

屈撓素不悅久之會林邑獻白鸚鵡素促召正玄使  
者相望及至卽令作賦正玄倉卒之際援筆成章素  
見文不加點始異之因令更擬諸雜文筆十有餘條  
又著立成而辭理華贍素乃嘆曰此真秀才吾所不  
及也

唐太宗貞觀十八年三月己丑有鄜州所舉孝廉賜  
坐於御前帝問曰歷觀徃古聖帝明王莫不得一奉  
天必以黎元爲本隆邦建國亦以政術爲先天以氣  
變物莫知其象君以術化人不顯其機氣以隱質爲  
虛術以潛通爲妙運之無爲施之無極故能清風蕩

萬域長轡控八荒不令而行不言而信欲尊此術未  
辨其方想望高才以陳良策孝廉等文之無對又令  
皇太子問之曰夫子何以爲魯參說孝經孝廉答云  
夫子以弟子之中參最稱孝所以爲說太子曰禮記  
云公明儀問魯子曰夫孝子先意承志喻父母於善  
參直養而已安能爲孝據此而言參未云孝又問禮  
云居處不莊非孝也事君不忠非孝也蒞官不敬非  
孝也朋友不信非孝也戰陣無勇非孝也五者不遂  
災及於親此五孝施用若爲差等孝廉不能答次令  
近臣迭問仁孝之名誰所創作明其優劣仁孝何先

又問孝廉於四行之內居第幾科又問社主之義殷  
栢周粟秦漢以來若爲變改又問堯舜聖德應貽厥  
孫謀何因朱均以降絕滅無後孝廉並不能答帝曰  
昔楚莊王謀事羣臣莫及退而有憂色曰諸侯能自  
得師者王自爲謀而莫已若者亡今以不穀之不肖  
羣臣莫吾逮吾國幾亡乎朕發語徵天下俊異纔以  
淺近問之咸不能答海內賢哲將無其人耶朕甚憂  
之今引就中書省射策所答乖旨於是下詔曰朕遐  
想千載旁覽九流詳求布政之方莫若薦賢之典是  
以元覽就列彥微可以立帝功管隰爲臣中人可以

成霸業朕縮懷曩烈虛已英奇斷斷之士必昇於廟  
廟九九之術不棄於閭閻猶恐在陰弗和獨善難奪  
永言髦傑無忘寤寐是以去夏之中爰動翰墨披露  
丹府疇咨海內尺木旣樹思覩游霧之羣雲羅宏舉  
佇降翔庭之翼而諸州所舉十有一人朕載懷彥席  
引入內殿借以溫顏畧訪政道莫能對厥相顧結舌  
朕仍以其未覩廷闕能無戰慄令於內省更以墨對  
雖搆思彌日終不答問旨理旣乖違詞亦庸陋豈可  
飭丹漆於朽質假風雲於決起者哉宜並放還各從  
本色其舉至以舉非其人罪論仍加一等然則今之

天下猶古之天下也寧仲舒伯始之流偏鍾美於往代秀彥廣基之侶猶絕響於今辰故其見之也則平津與樂安並進其不用也則敬通與寧伯同悲淮陽所以興言子長所以始嘆因斯論之良繇俊造難進或固棲遲之節牧宰循嘗未盡搜揚之道撫事長息彌增憮然其令州縣依前薦舉皆集今冬奇偉必收浮華勿採無使巴人之調濫吹於簫韶魏邦之珍沉光於江漢務盡報國之義以副興賢之懷

高宗顯慶四年二月引諸色目舉人謁見下詔策問之凡九百餘人唯李巢張昌宗秦相如崔行功郭待封五人爲上第令待詔弘文館仍時隨仗供奉

調露元年十二月壬子帝臨軒引岳牧舉人問之曰兵書云天陣地陣人陣各何謂武陟尉員牢千對曰臣觀載籍謂天陣星宿孤虛也地陣山川向背也人陣偏伍彌縫也臣以爲不然夫師出以義有若時雨得天之時此天陣也兵在足食且耕且戰得地之利此地陣也三軍使兵士如父子兄弟得人之利此人陣也三者去矣將何以戰帝又問皇道帝道王道何以區別朕今可行何道長壽令蕭思問越州叅軍周彥昭以次應詔帝皆稱善甲寅御製問目以試之



則天載初元年太后臨朝二月十四日試貢舉人於  
絳城殿前數日畢

臣欽若等曰殿前  
試人自茲始也

玄宗開元九年四月甲戌親策試應舉人於含元殿  
謂曰古有三道今減從一道近無甲科朕將存其上  
第務收賢俊用寧軍國仍令有司設食

五月壬戌有司引應制舉人見勅曰興化立理急於  
雋賢呈才效用屬在文武朕恭默思道寤寐勞求長  
想幽玄屢申徵賁今邊隅未靜師旅時興屬聽鼓鼙  
載懷屠鈞廣求百夫之特以作四方之守總夫戎政  
爰詔武臣弘我風教諒惟儒林卿等或謀慮深遠或  
學藝該通來應旌招深副虛佇並宜朝堂坐食訖且  
歸私第卽當有試期也

乙亥親試應制舉人於含元殿命有司置食勅曰卿  
等知蘊韜畧學綜古今喬木將遷虛鍾待扣旣膺旁  
求之辭佇聞明試之言各整爾能對敷所問古有三  
道朕今減其二策近無甲科朕將存其上第務收賢  
雋用寧軍國並宜卽存緩詳思之

十四年七月癸巳以御雒城南門樓親試岳牧舉人  
及東封獻賦頌人命太官置食賜物有差

十五年五月詔中書門下引文武舉人就中策試於

是藍田縣尉蕭諒右衛冒曹梁涉邠州柱國子張玘  
 等對策稍優錄奏帝謂源乾曜杜暹李元絃等曰朕  
 宵衣旰食側席求賢所以每念搜揚者恐草澤遺才  
 無繇自達至如畿尉衛佐未經推擇更與褐衣爭進  
 非朕本意繇是唯以張玘為下第放選餘悉罷之  
 九月庚辰帝御維城南門親試沉淪草澤詣闕自舉  
 文武人等

二十六年八月甲申親試文詞雅麗舉人命有司置  
 食勅曰占者求士必擇其才考之以文施於有政自  
 非體要何用甄明頃年以來亦嘗親試對策者衆而

登科者少蓋繇宿構之詞不與所問相對所以然也  
 卿等博達古今聿膺推薦朕之所問皆有節目宜指  
 事而對勿措游辭並宜坐食食訖就試有郭納姚子  
 彥等二十四人升第皆量資授官

二十九年八月御興慶門樓親試明道德經及莊文  
 列子舉人問策曰朕聽政之暇嘗讀道德經文列莊  
 子其書文約而義精詞高而旨遠可以理國可以保  
 身朕敦崇其教以左右人也子大夫能從事於此甚  
 用嘉之夫古今異宜文質相變若在宥而不理外物  
 而不為行遂古之化非御今之道適時之術陳其所

宜又禮樂政刑所以經邦國聖智仁義所以序人倫  
使之廢絕未知其旨道德經曰絕學無憂則乖進德  
修業之教列子力命曰汝奚功於物又違懲惡勸善  
之文二旨孰非何優何劣文子曰金積折廉壁壘宜  
申其義莊子曰恬與和交相養明徵其言使一理混  
同二教兼舉成不易之則副虛佇之懷有姚子彥蘄  
能元載等入第各授之以官

天寶元年九月庚申御花萼樓試文武舉人命有司  
供食

十月應文詞秀逸舉人崔明允等二十人儒學博通

劉崇等八人軍謀越衆令狐朝等七人並科目各依  
資授官

十載九月辛卯御勤政樓試懷材抱器舉人命有司  
供食有舉人私懷文策坐殿三舉並貶所保之官

丙申舉人並下第勅曰朕祗膺寶曆殷鑒遠圖慮草  
澤之遺賢降弓旌於屢辟是以三紀於茲羣材輻湊  
或一言可紀必適輪轅一善有經每加獎進庶六合  
之內靡然同風四科之門咸能一貫何茲意之緬邈  
而增修之寂寥今者舉人深乖宿望朕之所問必正  
經史卿等所答咸皆少通所問多否以獨鑒未周必

資僉議爰命朝賢三事精加詳釋咸以爲闕於聚學莫可登科至於每歲秀才有司考試帖經問策兼以雜文假如及第在階選序今之將舉待以榮班各非異才孰可超獎墾鑿經傳且未精勤俯拾青紫豈宜倖覲其懷才抱器舉人並放更習學卽好去其有不對策羅嘉茂旣是白丁宜於劍南効力全不答所問崔慎惑劉灣等勒爲本郡充學生之數勿許東西其所舉官各量貶殿以示懲誠

十三載十月御舍元殿親試博通墳典洞曉玄經詞藻宏麗軍謀出衆等舉人命有司供食旣而暮罷其詞藻宏麗科司策外更試律賦各一首制舉試詩賦自此始也時登甲科者三人太子正字楊綰爲所稱乙第者凡三十餘人

肅宗乾元二年三月丁亥御宣政殿親試文經邦國等四科舉人

代宗寶應二年五月丙寅尚書省試應制舉人在丞侍郎對試賜舉人食如舊儀

大曆二年十月御紫宸殿策試茂才異行安貧樂道孝悌力田高道不仕等四科舉人  
六年四月戊午御宣政殿親試諷諫主文茂才異等

智謀經武博學專門等四科舉人帝親慰免有司嘗  
食外更賜御厨珍饌及茶酒禮甚優異舉人或  
有敝衣菜色者帝憫之謂左右曰兵革之後士庶未豐皆  
自遠來資糧不足故也因爲之泣下時方炎暑帝具  
朝衣永日危坐讀太宗貞觀政要及舉人策成悉皆  
觀覽一百餘道將夕有策未成者命大官給燭令盡  
其才思夜分而罷時登科者凡一十五人

册府元龜

淮南李嗣京參閱

西極文翔鳳訂正

豫章黃國琦較釋

貢舉部 六

考試第二

唐德宗正元元年九月乙巳御宣政殿策賢良方正  
能直言極諫等三科舉人皇帝若曰蓋聞上古至道  
之君垂拱無爲以臨海內不理而人化不勞而事成  
星辰軌道風雨時若邈乎其不可繼何施而臻此歟

三代以來制作滋廣異文質之變明利害之嚮威之以刑道之以禮敦其俗而彌薄防其人而益踰豈澆醜必繫於時邪何聖賢間生而莫之振也朕祗膺累聖之業猥居兆人之上虔恭求厲如恐失墜憂濟庶務夕惕晨興唯求前王之典謀朕乃是憲是則師大禹以崇儉法高宗以求賢興夏啓之征作周文之罰旌孝悌舉直言養高年敦本業平均徭稅黜陟幽明勵精孜孜勤亦至矣然而浮靡不革理化不行暴亂不懲姦犯不息五教猶鬱七臣未臻嚮黨廢尚齒之儀蒸黎無安土之志賦入日減而私室愈貧庶察日增而吏道愈濫意者朕不明歟何古今之事同而得失之效異也思欲剗革前弊創立新規施之於事而易從考之於文而有據備陳本末將舉而行無或憚煩略於條對自頃陰陽舛候稔沴薦興仍歲旱蝗稼穡不稔上天作孽必有由然屢降凶災其咎安在傳日時之不又厥罰暘又日堯湯水旱數之常也二者乖反其誰云從今人靡蓋藏國無廩積朕屢延卿士詢訪謀猷至乃減冗食之徒罷不急之務旣聞嘉話亦已遵行而停廢之餘所費猶廣俟轉輸於江徼則遠不及期將搜粟於關中則擾而無獲節軍食則功

臣懷怨省吏員則多士靡歸中心浩然罔知僂濟子  
大夫蘊蓄材器通明古今副我虛求森然就列禪朕  
之寡昧拯時之艱災畢志直書無所隱

十月甲子授賢良方正能直言極諫韋執誼等一十  
八人官有差

十年九月丁丑以官授賢良方正能直言極諫前進  
士裴垕等一十人

憲宗元和元年四月丙午命宰臣已下監試應制舉  
人於尚書省以制舉人皆先朝所徵故不親試制曰  
朕以寡薄獲奉睿圖嚴恭寅畏不敢暇逸永惟萬邦

之廣庶務之殷而燭理未明體道未至思欲復三代  
之盛烈顯十聖之耿先是用許求正言思繼先志下  
大夫等藏器斯久貴然而來白駒就維洪鍾待扣庸  
茲獻納朕甚嘉之言觀國先宜有廷試本將詢事豈  
忘臨軒園邑有期營奉是切求言誠感未暇躬親爰  
命公相泊於卿士親諭朕意延訪嘉謀至於興化之  
源才識攸重練達吏理詳明儒術當是三道副朕旁  
求意或開予靡有所隱條例所問畢志盡規當酌古  
而參今使文約而意備朕將親覽擇善而行並宜坐  
食訖就試策賢良曰朕觀古之王者君人受命兢業

敬天順地靡不思賢能以濟其理求讜直以聞其過  
故禹拜昌言而嘉猷罔伏漢徵極諫而文學稍進康  
時濟俗罔不率繇厥後相循有名無實而又設以科  
條增求茂異捨斥已之至言角無用之虛說文旨著  
明罕稱於代茲朕所以嘆息鬱悼思索其真是用虛  
懇惻之誠咨體用之要庶乎言之可行行之不倦上  
獲其益下輸其情君臣之間譴然相與子大夫得不  
勉思朕言而茂明之我國家光宅四海年將二百十  
聖弘化萬邦懷仁三王之禮靡不講六代之樂罔不  
舉寢澤於下升中於天周漢已還莫斯爲盛自禍階

漏壞兵宿中原生人困竭耗其大半農戰非古衣食  
罕儲念茲疲屵遂乖富庶督耕植之業而人無戀本  
之心峻摧酷之科而下有重歛之困舉何方面可以  
復其盛用何道而可以濟其艱既往之失何者宜懲  
將來之虞何者當戒昔王父懲患於堯錯而用推恩  
夷吾致霸於齊桓而行寓令精求古人之意啓迺來  
哲之懷眷茲洽聞罔所詳究又執契之道垂衣不言  
委之於下則人用其私專之於上則下無其效元帝  
優游於儒學盛業竟衰光武責課於公卿峻政非美  
二途取捨未獲所從余心浩然益所疑惑子大夫敦



究其旨屬之於篇興自朕躬無悼後害

辛酉詔曰構大厦者必總於群材成大用者必資於

百谷故思理之主求賢罔遺所以昭宣令圖廣大前

緒觀文緝化其在茲乎朕以寡昧獲奉丕業虛已問

政實始於茲考言求益敢不祗若故命左右輔弼洎

有位之臣會於中臺必究其論問審以獻省自朕躬

果獲賢能副於饑渴才識兼茂明於體用科人第三

次等元稹韋惇第四等獨孤郁白居易曹京伯韋慶

復第四次等崔韶羅讓崔護元修薛存慶韋珣第五

上等蕭俛李蟠沈傳師柴宿達於吏理可使從政科

第五上等陳皓等咸以待問之美觀光而來詢以三

道之要復於九變之選得失之覽粲然可觀宜膺德

茂之異式叶言揚之舉其第三次等人委中書門下

優與處分第四次等第五次等中書門下卽

與處分

三年二月御宣政殿試四科舉人

裴垣元和初召入翰林三年詔舉賢

良時有皇甫湜對策其言激切牛僧儒李宗閔亦苦諫時政考官楊於陵韋質之考三策皆在裴垣居中復視無所同異及為貴幸泣訴請罪於帝帝不得已出於陵質之官罷垣翰林學士除戶部侍郎

穆宗以元和十五年正月卽位二月壬寅勅應賢良

方正直言極諫科等人宜令中書門下尚書省四品

以上三月二十三日於尚書省同試

三月戊午吏部尚書趙宗儒等奏應制科人等伏奉  
今月十一日勅比者先朝徵集應制人等已及時限  
恐皆來自遠方難於久住酌宜審事遂委有司定日  
就試如聞所集之人多已分散須知審酌然議裁定  
其令所司商量聞奏者伏以制科所設本在親臨南  
省策試亦非舊典今覃恩旣畢庶政惟新况山陵日  
近庶務繁迫待問之士就試非多臣等商量恐須停  
罷從之

長慶元年三月勅今年進士及第鄭朗等一十四人

宜令中書舍人王起主客郎中知制誥白居易試聞  
奏

四月丁丑詔曰國家設文學之科本求才實苟容僥  
倖則異至公訪聞近日浮薄之徒善爲朋黨謂之關  
節干擾主司每歲策名無不先定永言敗俗深用興  
懷鄭郎等昨令重試意在精覈藝能不於異書之中  
固求深僻題目貴令所試成就以觀學藝淺深孤管  
是祭天之樂出於周禮正經閱其呈試之文都不知  
其本事詞律鄙淺無累至多亦令宣示錢徽庶其深  
自懷愧誠宜盡棄以警將來但以四海無虞人心方

奏用引寧僭式示殊恩特掩爾瑕庶明予志孔溫業  
趙存約竇洵直所試粗通與及第盧公亮等十人並  
落下從自今以後禮部舉人宜准開元二十五年勅  
兄弟訖所試雜文并策送中書門下詳覆貶禮部侍  
郎錢徽爲江州刺史

十月詔文武嘗叅官及諸州府准制舉薦賢良方正  
八等以十一月二十五日御宣政殿策試宜令所司  
准式

十一月戊午御宣政殿試制科舉人制曰古人有言  
嘗引一代之人以理一代之務雖雋賢茂彥不乏於

時然亦在敷納以言精覈其實若決川瀆以導其氣  
考金石以求其音使抱忠義者必盡其誠知古今者  
必先其慮朕纂承鴻業以撫兆人嘗欲效三代之禮  
修烈祖之法猶念和氣之未洽休祥之未臻百姓之  
未安五兵之未戢故詳延修潔之士庶得乎未聞將  
以達天地之心究俗化之變研安危之慮探理亂之  
言子大夫覃思於六經馳騫於百氏得不講求至論  
以沃朕心方直者舉朕之闕政術者體時之要慕玄  
遠者裨其論贍文詞者抑其華言經者折衷於聖人  
以明教化論將者先之以仁誼無效縱橫於戲子大

夫當朕之時必思自達且古之翼戴其君者尚委輅  
納說荷擔吐奇由壺闕之上言自南昌而諷刺况文  
陛之下負宸親臨若藏器不耀結囊而去願朕深志  
復何望焉當體予衷無懼後害宜坐食訖就試又策  
賢良曰蓋聞舜禹之有天下也起於側微積德累勤  
多歷年所經聖之慮豈有遺哉然猶好問察言勤求  
賢士蓋以承天之任重憂人之志深也况朕長於深  
宮涉道日淺奉列聖之洪緒撫萬寓之黎人夙夜嚴  
恭不敢有懈實懼燭理未究省躬未明所以詳求讜  
言以輔不逮子大夫是宜發所蘊蓄沃予虛懷當極

意正詞勿有隱諱昔王政之興必臻於康泰霸道所  
立由致於富彊我國家提封濫於三代斟酌兼乎百  
王無堯湯之災積祖宗之禮而人未蕃庶俗尚彫訛  
家無蓋藏公闕儲峙卒乘之數貨帛之資統而較之  
莫計前代豈率土生殖變於古歟將阜時政令失於  
今歟固以揣摩必窮利病明徵未失之漸具陳興復  
之譽且文武兼學以成身士農迭居以豐業故家給  
足以戀本才周可以應時近古各徇一端不相資用  
政令從事異心難以成課民佚無守輕爲游墮指明  
共貫之方訢合二途之利永言致理期約厥中施爲

或差得失斯遠將修睦勸義則在下難知將任數馭情則人心益僞思聞旨要得合誠明旌別比周之情敷詳忠厚之道知人則哲從古攸慎九徵恐泥五事難精或望可服人而智非周物或言皆詣理而行者非方宜定取捨之端以彰真僞之辨至於朝廷之闕四方之弊詳延而至可得而書退有後言朕所不取于大夫而勉之中書舍人白居易膳部郎中陳岵考工員外郎賈餗同考制策

十二月辛未制曰朕自郊上玄御端門發大號與天下更始思得賢雋標明四科令群公卿士暨守土之

臣詳延下位周於革澤成列待問副予虛求昧爽臨軒俾究其論正辭良術精義宏謀繹之旬時深見忠益言刈其楚列而第之賢良方正能直言極諫第三等人龐巖第三次等人呂術第四次等人韋曙姚中立李躔第四次等人崔嘏崔龜從任暉第五次等人韋正貫崔知白陳玄錫博通墳典達於教化第四等人李思玄詳明政術可以理人第四次等人崔郢軍謀宏遠堪任將帥第三次等人吳思第五次等人李商卿咸以懿學茂識揚於明廷况當短晷之辰頗着論思之美粲然高論深沃朕心永言藏器之規豈忘繫駒之

義寵之命秩允答嘉猷其第三等人第三次等人委  
中書門下優與處分其第四次等人第五上等人中  
書門下卽與處分

甲申以登制科人前試弘文館較書郎龐嚴爲左拾  
遺前試秘書省較書郎張述爲右拾遺前試太常寺  
協律郎吳思爲右拾遺供奉京兆府富平縣尉韋曙  
爲左拾遺內供奉前鄉貢進士姚中立李躔崔暇並  
可秘書省較書郎同州參軍崔龜從爲京兆府鄠縣  
尉太子正字任畹爲京兆府興平尉草澤韋正貫爲  
太子較書郎前鄉貢進士崔知白爲秘書省正字前

鄉貢進士崔郢爲太子較書郎前鄉貢進士李商卿  
爲崇文館較書郎制曰昔仲尼之門以四科品第諸  
生所得十哲今吾徵四海九州之士而登名者十有  
五人搜羅簡拔非不勤至以今况古可謂才難是用  
詔爵以嘉獎其忠超擢以光明其道俾巖石之下人  
思自奮晁董之盛遠以爲隣延登諫垣式佇忠益讐  
書結綬皆曰顯途修其秩次亦示科等服我遠命助  
我遠猷可依前件

敬宗寶曆元年三月辛酉詔嘗參及諸州府唯去年  
三月三日制舉諸色科目見到總三百一十九人今

月二十八日御宣政殿臨試宜付所司准式  
辛未帝御宣政殿試制舉人詔曰朕聞心術順道天  
下可一言而興聰明壅途堂上有千里之遠故唐虞  
而降則考試觀俗漢魏之際則詔策求賢朕纘紹丕  
圖撫臨方夏實懼誠有所偏信鑒有所未周乃前歲  
詔六官九卿方岳尹正有位之士逮於庶僚高懸四  
科博薦群彥將訪衆政之闕酌至論之中子大夫庭  
列儼然可應其品是用宵與前殿永日渴求條列坦  
明咸本經史固子大夫之所講磨矣當竭誠慮無有  
蘊藏宜坐食訖就試以中書舍人鄭涵吏部郎中李  
虞仲並充考制策官

丁亥制曰朕深居法宮高處宸極嘗慮天下多務壅  
於上聞朝廷大猷闕於中典至於伏陛叩顙造膝犯  
顏皆驟遷顯榮寵以優錫尤思物不得茂遂道有所  
鬱堙是用虛中訪賢側席前殿緘密以獻閱自朕躬  
切弼予違無所回忌第於上下揚於正朝吾之不佞  
亦可謂信於海內矣賢良方正能直言極諫科舉人  
第三等唐仲韋端符舒元襄第四等蕭敞楊魯士楊  
儉來擇趙杞裴暉第四次等韋繇李昌實嚴荆田兗  
崔璜第五上等李澹蕭夷中馮球元晦詳閑吏理達

於教化科第五上等韋正貫軍謀宏遠材任邊將科  
第三等裴儔第四次等侯雲章咸以讜言正詞兵符  
教本應問如響不窮如泉著之於篇爛然盡在宜膺  
中鵠之選用叶縻爵之經在第三等人委中書門下  
優與處分第四等第四次等第五上等中書門下卽  
與處分後不數日帝謂宰相曰韋端符楊魯士皆涉  
物議宜與外官端符授同州白水縣尉魯士授興元  
府城固縣尉宰臣等竟請罪名不得

文宗太和二年三月辛巳御宣政殿親策試制舉人  
詔曰志本於道蓋道以致君為先代實生才蓋才以  
濟理為務不索何以獲其實不言何以知其志故帝

堯重詢衆之訓殷宗首沃心之術其傳曰嘉言罔攸  
伏又曰俊民用彰漢魏以還詔策時作暨於我唐遵  
為故事繇是善政惟又魁能間出朕祇荷大寶勤恤  
兆人明不燭於幽暗惠未流於鰥寡御朽兢慮求思  
永圖是以詔命有司會羣材列稽疑延闕政子大夫  
達學通識儼然來思操觚濡翰條誨宿滯慰我虛佇  
必引嘉猷故臨軒命書策以審訪繼燭俟奏其悉乃  
辭各宜坐食食畢就試左散騎嘗侍馮宿太嘗少卿  
賈餗庫部郎中龐嚴宜並充考制策官是日宰臣等



以監侍制舉人及夜並宿於中書省

甲午詔曰王者謹天戒酌人言叶時凝命資賢贊理

斯爲令典也朕以菲德祇膺大統歲屬凶旱人思底

寧庶察弊以勤理因舉能而詢衆科別條問臨軒致

試載搜尤才果副虛佇賢良方正能直言極諫科舉

人第三等裴休裴素第三次等李邵第四等南卓李

并杜牧馬植鄭亞崔璵第四次等崔讜王式羅紹京

崔渠崔慎繇苗愔韋昶崔搏第五上等崔渙韓賓詳

閑吏理達於教化科舉人第四次等宋昆軍謀宏遠

堪任將帥科舉人第四次等鄭冠李栻等皆直躬遵

道博古知微敷其遠猷志在引益實能攻朕闕紹政

經究天人交際之理極皇王道變之義指切精洽粲

然可觀旣校才於試可宜旌能於受祿其第三等第

二次等人委中書門下優與處分第四次等第五上

等人中書門下卽與處分時有劉蕢應直言極諫科

條對激切凡數千言雖不中第其文本行於時

三年三月御史臺據吏部分察姚中立稱准勅考試

別頭進士明經等官考功員外郎高緒考試禮部關

送列進士鄭齊之考景素兩人明經王淑等十八人

並及第放榜之後羣議沸騰職當分察不敢緘默及

得高鎔狀伏以進士明經並先無格限其所送進士  
二人文藝並堪與及第明經比年所送不過三五人  
今年禮部開送十一人及考試帖義十一人並堪與  
及第勅鄭齊之季景素據所試比校嘗例得者不甚  
過差宜並與及第明經王淑等五人覆試帖義通數  
高並與及第餘落之

武宗會昌四年二月權知貢舉左僕射判太常卿王  
起下及第二十五人續奏五人堪放及第楊知至竇  
緘陽嚴鄭朴源重奉勅只放楊嚴及第餘並落下

五年二月左諫議大夫陳商知舉放進士二十八人  
覆落八人時以去年僕射王起知舉放二十五人續  
奏江陵節度使崔元式甥鄭起東部留守牛僧儒女  
壻源重故相竇易直子緘監察御史楊收弟嚴勅遣  
戶部侍郎翰林學士白敏中覆試落下三人唯放楊  
嚴一人至是又遣敏中覆試落下八人議者以爲公  
宣宗大中元年正月禮部侍郎魏扶放及第二十三  
人續奏堪放及第三人封彥卿崔瑒鄭延林等皆以  
文藝爲衆翰林學士戶部侍郎知制誥韋琮等考盡  
合程度其月二十三日奉進止並付所司放及第有  
司考試只合在公如涉徇私自有刑典從今以後但

依常例取捨不得別有奏聞

懿宗咸通十一年正月以吏部尚書蕭鄴吏部侍郎  
于德孫吏部侍郎楊知温考官司勳員外郎李輝禮  
部員外郎崔澹等考試應宏詞選人

十二年三月以吏部尚書蕭鄴吏部侍郎歸仁晦李  
當考官司郎中鄭紹業兵部員外郎陸勳等試宏詞  
選人

十三年三月以吏部尚書蕭鄴吏部侍郎獨孤雲考  
官職方郎中趙蒙駕部員外郎李紹考試宏詞選人  
試日蕭勳替差右丞孔温裕權判

德宗乾符四年正月以吏部尚書鄭從讜吏部侍郎  
孔晦吏部侍郎崔堯考宏詞選人

五年六月以吏部尚書鄭從讜吏部侍郎崔沆考宏  
詞選人

六年三月以吏部侍郎崔沆崔澹試宏詞選人駕部  
郎中盧蘊刑部郎中鄭頊為考官

晉高祖天福七年五月勅應諸色進策人等皆抱材  
能方來投獻宜加明試俾盡臧謀起今後應進策條  
中書奏覆勅下其進策人委門下省試策三道仍定

上中下三等如是元進策內有施行者其所試策或

上或甲者委門下省給與減選或出身優牒合格叅  
選日其試策上者委銓司超壹資注擬其試策中者  
委銓司依資注擬如是所試策或上或中元進策條  
並不施行所試策下元進策條內有施行者其本官  
並仰量與恩賜發遣若或所試策下所進策條並不  
施行便仰曉示發遣不得再有投進餘並准前後勅  
文處分

周太祖廣順元年六月差翰林學士魚崇諒就樞密  
院引試進策人考定昇降聞奏

三年五月勅進策獻書人宜令翰林學士申文炳如  
樞密院引試定優劣聞奏

十一月乙卯命翰林學士竇儼試進策官曹巨源鄧  
杲李曉等於禁中策曰王者以禮御人倫以樂和天  
地以兵柔萬國以刑齊兆民四者何先殊塗同治或  
因或革各適所宜故五帝殊時不相襲禮三王異世  
不相沿樂兵有務戰不戰之異刑有輕次重次之差  
歷朝張施繁不具引自唐祖混一函夏太宗嗣成聖  
功言其禮則三正有嘗言其樂則七宗有秩兵息而  
臣道咸順刑措而民心不渝五帝三王不足尚也越  
自天寶之後國經混然禮樂湮墜而衆不知兵刑煩

擾而下不畏朱梁晉漢皆用因仍洎我朝開創以來  
力務興振然薰歇燼滅歷年滋多焦思勞神觀效未  
著予欲父慈子孝兄友弟恭君仁臣忠夫義婦聽聲  
明文物無其缺祝嘏辭說必有序萬儀咸秩百神受  
職家肥國肥知禮之尊也當用何理副茲虛懷予欲  
六律六品七政九變金石絲竹之器羽旄干戚之容  
歌其政舞其德與夫文音武坐比崇昔時天和地平  
知樂之崇也予當深辨其理為時陳之予欲混同天  
下親征未照手振金鼓跋履山川加商高宗之伐鬼  
方若魏武帝之登柳塞則六師所至供億無窮衆興  
民勞自古皆慎若但任偏將屯於邊鄙縱兵時入茹  
食居人交尸塞路暴骨盈野終歲如是得無憫然何  
以令佳兵不具彼魁革面王塗無所現隔方貢自來  
駿奔更思爾謀以逮明畧予欲斧鉞不用刀鋸不興  
桎梏朽蠹無所設施無城春鬼薪之役無三居五宅  
之流盡衣冠而人不犯虛囹圄而不入無刑之理何  
以致諸子大夫博議洽聞窮微覩奧提筆既干於奇  
遇撞鍾必應於嘉音抱屈將伸直言勿隱旣而以所  
對之詞上進乃授巨源及杲簿椽賜曉進士出身

册府元龜

淮... 李嗣京參閱

西極文翔鳳訂正

豫章黃國琦較釋

貢舉部 七

科目

自三五以來貢舉之日未之聞也考諸周制乃有德行道義之舉謂之賢能又有四士曰選曰俊曰造曰進自卿大夫司徒樂正皆論其秀司馬論其賢然後官之此周公所以垂大法也漢魏而下以迄於五代

或召郡國限其口率或令公卿舉其所知或廣示於  
詳延或兼許而自至正乃科級之沿革名品之差異  
申千有餘里蓋數十百數今之論選歷代而小年成  
亦盡於斯而已矣

漢惠帝四年正月詔舉民孝悌力田者

文帝二年十一月詔舉賢良方正能直言極諫者

十五年九月詔諸侯王公卿郡守舉賢良方正直言  
極諫者

武帝建元元年冬十月召丞相御史列侯中二千石  
二千石諸侯相舉賢良方正直言極諫之士

元光元年十一月初令郡國舉孝廉各一人

孝謂善  
事父母

廉謂清潔  
有廉隅也

元封五年四月詔令州郡察民吏有茂才異等可為  
將相及使絕域者

昭帝始元五年六月詔令三輔太常舉賢良各一人

郡國文學高第各一人

宣帝本始元年四月詔內郡國舉文學高第各一人

四年四月詔令三輔太常內郡國舉賢良方正各一

人

地節三年十一月詔曰其令郡國舉孝悌有行義聞

於鄉里者各一人

元康元年八月詔舉吏民厥身修正通文學明於先

王之術宣究其意者各二人中二千石各一人

四年正月制舉茂才異倫之士

神爵四年四月詔令內郡國舉賢良可親民者各一

人

元帝初元二年三月詔丞相御史二千石舉茂才異

等直言極諫之士

永光元年二月召丞相御史舉質樸敦厚遜上有行

者光祿歲以此科第郎從官

始今丞相御史舉此四科人以擢用之而見在

郎及從官又令光祿每歲依此科考發定其第高下申知其入賢否

二年三月詔內郡國舉茂異等賢良直言之士一人

成帝建始二年二月詔令內郡舉賢良方正各一人

三年十二月詔丞相御史與將軍列侯中二千石及

內郡舉賢良方正能直言極諫之士

河平四年三月詔舉敦厚有行能直言之士

江加二年三月詔舉敦厚有行義能直言者

元延元年七月詔內郡國舉方正能直言極諫者各

一人北邊二十二郡舉勇猛知兵法者各一人

哀帝建平元年二月詔大司馬列侯將軍中二千石



州牧守相舉孝悌醇厚能直言通正士延於側陋可親民者各一人

四年冬詔將軍中二千石舉明兵法有大慮者

元壽元年春正月詔將軍列侯中二千石舉賢良方正能直言者各一人

平帝元始元年五月詔公卿將軍中二千石舉醇厚能直言者各一人

二年秋舉勇武有節明兵法郡一人詣公車

後漢光武建武七年四月召公卿司隸州牧舉賢良方正各一人遣詣公車

孝帝建初元年二月詔太傅三公中二千石二千石

郡國守相舉賢良方正能直言極諫之士各一人

五月初舉孝廉郎中寬博有謀任典城者以補長相

任堪使也典主也長  
謂縣長相謂侯相

八年十二月詔書辟士四科一曰德行高妙志節清

白二曰經明行修能任博士三曰明曉法律足以決

疑能案章覆問文任御史四曰明毅多畧遭事不惑

明足炤姦勇足決斷才任三輔令皆存孝悌公清之

行自今已後審四科辟召及刺史二千石察舉茂才

尤異孝廉吏務實較試以職有非其人不習曹事正

舉者故不以實法之也

和帝永元六年三月詔令三公中二千石二千石內郡守相舉賢良方正能直言極諫之士各一人

七年四月詔有司詳選郎官寬博有謀才任典城者三十人

安帝永初元年三月詔公卿內外官郡國守相舉賢良方正有道術之士明政術達古今能直言極諫者各一人

五年閏三月詔令三公特進侯中二千石二千石郡守諸侯相舉賢良方正有道術達於政化能直言極

諫之士各一人及至孝與衆卓異者并遣詣公車

七月詔三公特進九卿較尉舉列將子孫明曉戰陣任將帥者

元和元年四月詔三公特進列侯中二千石二千石郡守舉敦厚質直者各一人

建元元年十一月詔三公特進侯卿較尉舉武猛堪將帥者各五人

順帝初卽位詔公卿郡守國相舉賢良方正能直言極諫之士各一人

永和三年九月令大將軍三公各舉故刺史二千石

及見令長郎謁者四府掾屬剛毅武猛有謀謨任將帥者各二人特進卿較尉各一人

漢安元年二月詔大將軍公卿舉賢良方正能探贖索隱者各一人

冲帝永嘉元年九月詔三公特進侯卿較尉舉賢良方正幽逸修道之士各一人

桓帝建和元年四月詔大將軍公卿較尉舉賢良方正能直言極諫者各一人又詔大將軍公卿郡國舉至孝篤行之士各一人

三年六月詔大將軍三公特進侯共舉卿較尉舉賢

良方正能直言極諫之士各一人

永興二年二月詔公卿較尉舉賢良方正能直言極諫者各一人

延熹八年正月詔公卿較尉舉賢良方正

九年正月詔公卿較尉郡國舉至孝

七月詔舉武猛三公各二人卿較尉各一人

靈帝中平元年三月詔公卿舉列將子孫及吏民有明戰陣之畧者詣公車

魏文帝黃初四年五月詔舉天下雋德茂才獨行君子

明帝泰和二年十月詔公卿近臣舉良將各一人

四年十二月詔公卿舉賢良

青龍元年三月詔公卿舉賢良篤行之士各一人

晉武帝泰始四年十一月詔王公卿及郡國守相舉

賢良方正直言之士

五年十二月詔州郡舉勇猛秀異之才

七年六月詔公卿以下舉將帥各一人

八年二月詔內外郡官舉任邊郡者各三人

太康九年五月詔內外羣臣舉守令之才

成帝咸和六年三月詔舉賢良直言之士

七年十一月詔舉賢良

宋孝武大明六年正月詔其有懷真抱素志行清白

或識通古今才經軍國具以名聞

前廢帝景和元年八月詔曰其有孝性忠節幽居遯

棲信誠行義廉正表俗文敏博識幹事治民者精加

詳括

明帝泰始二年十二月詔曰林澤貞栖丘園耿潔博

治古今敦崇孝讓者具卽以聞隨就褒立

五年九月詔其有身栖隱約息事衡樊志恬江海行

高塵俗者所在精加搜括時以名聞

後廢帝初卽位詔其有孝友門族義讓光閭或匿名  
屠釣隱采耕牧足以整厲澆風扶益淳俗者俟聞嘉  
薦

梁高祖天監元年四月詔若懷寶迷邦蘊竒待價蓄  
響藏真不求聞達並依名騰奏

十四年正月南郊詔若有確然鄉黨獨行州閭肥遯  
丘園不求聞達藏噐待時未加收採或賢良方正孝  
悌力田並卽騰奏具以名上

普通三年五月詔連率郡國舉賢良方正直言之士  
太清元年正月詔或德茂州閭道行鄉邑或獨行丘  
壑聞達不求咸使上言

陳文帝天嘉元年七月詔王公已下其各進舉賢良  
宣帝大建四年九月赦詔耆艾絕倫或妙年異等凡  
厥在位各舉所知

後魏明元永興五年二月詔有德行清美學優義博  
可爲人師者令詣京師

太武延和元年十二月詔州郡進舉賢俊各令鄉閭  
推舉旣至當待以不次之舉隨才文武任之政事  
孝文延興二年秋七月壬寅詔州郡縣各遣二人才  
堪專對者赴行在所

形所元書科目  
三年冬十一月詔其力田孝悌才器有益於時信義著於鄉閭者具以名聞

太和十七年九月詔孝悌廉義文武應求者皆以名聞

十八年春正月詔孝悌廉義文武應求者皆以名聞  
十一月辛未詔冀定二州孝義廉貞文武應求者具以名聞

十二月詔郢豫二州孝悌廉義文武應求具以名聞  
十九年四月詔兖州刺史舉部內士人才堪軍國具以名聞

六月詔孝悌廉義文武有堪者具以名聞

二十一年正月詔雍州其孝友德義文學才幹悉仰貢舉

前廢帝普泰元年三月詔有德孝仁賢忠義志信者可以禮召赴闕

北齊孝昭皇建二年詔其高才良器允文允武理識深長幹具通濟操履凝峻學業宏贍諸如此輩隨取一長無待兼資方充舉限

後周閔帝元年正月詔二十四軍宜舉賢良堪治民者軍別九人

武帝建德三年二月詔六府各舉賢良清正之人  
四年十月詔諸畿郡各舉賢良

六年三月詔山東諸州各舉明經幹治者二人若奇  
才異術卓爾不羣者不拘多少

隋文帝開皇三年正月詔舉賢良

十八年七月詔京官五品已上總管刺史以志行修  
謹清平幹濟二科舉人

仁壽三年七月詔令州縣搜揚賢哲皆取明知古今  
通識治亂寃政教之本達禮樂之源者不限多少不  
得不舉

煬帝大業三年四月詔夫孝悌有聞人倫之本德行

敦厚立身之基或節義可稱或操履清潔所以激貪

厲俗有益風化強毅正直執憲不撓學業優敏文才

美秀並為廊廟之用實乃瑚璉之資才堪將略則拔

之以禦侮齊力驍壯則任之以爪牙爰及一藝可取

亦宜採錄文武有職者五品已上宜依今十科舉人

有一於此不必求備朕當待以不次隨才升擢

五年六月詔諸郡學業該通才藝優洽齊力驍壯超

絕苛倫在官勤慎堪理政事立性正直不避強禦四

科舉人

十年五月詔郡舉孝悌廉潔各十人

唐太宗貞觀十一年四月詔其有孝悌淳篤兼閑時務儒術該通可為師範文詞秀美才堪著述明識治體可委字民弁志行修立為鄉閭所推者舉送雒陽宮

十五年六月詔令天下士庶人之内或識達公方學綜今古廉潔正直可以經國佐時或孝悌淳篤節義昭顯始終不移可以敦風厲俗或儒術通明學堪師範或文章秀異才足著述並宜薦舉具以名聞

十七年五月乙丑詔令州縣舉孝廉茂才好學異能

卓犖之士

高宗以正觀二十三年六月卽位九月詔其有經明行修談講精熟具此師嚴才堪教胄者志節高妙適用清通博聞強記終堪鄉輔者遊情文藻下筆成章授心處事端平可紀者疾惡楊善依忠履義執持典憲終始不移者京司長官上都督府及上州各舉二人中下州刺史各舉一人

顯慶元年十月詔宜令河南河北江淮巴南州縣或緯俗之英聲馳管樂或濟時之器價逸蕭張德宰帝師材堪棟輔者必當任之不次



二年二月詔宜令京官五品以上及諸州牧守各舉所知或勇冠三軍翹關拔山之力智兼百勝緯地經天之才蘊奇策於良平馳功績於衛霍蹤二起於吳白軌雙李於牧廣賞織善而萬眾悅罰片惡而一軍懼如有此色可精加採訪各以奏聞

三年二月志烈秋霜科

韓思彥及第

五年六月詔內外官四科舉人或孝悌可稱德行夙著通涉經史堪居繁劇或游泳儒術沉研冊府下帷不倦博物馳聲或藻思清華詞鋒秀逸譽標文雅材堪遠大或廉平處事強直為心洞曉刑書兼包文藝者精加搜訪各以名薦

龍朔三年八月詔內外官五品以上各舉巖藪幽素之士

乾封元年幽素科

蘇瓌解琬苗神客格輔元徐昭劉訥言崔谷神及第

二年十月令天下諸州舉鴻儒碩學博聞強記之士

上元三年正月詞殫文律科

崔融及第

儀鳳元年十二月詔或孝悌通神遐邇推敬或德行光俗邦邑崇仰或學綜九流垂帷觀與或文高六義下筆成章或備曉八音洞該七曜或射能穿札力可翹關或丘園秀異志存栖隱或將帥子孫素稱勇烈

亦有婆娑鄉曲負材傲俗為譏議所斥陷於跣跣之流者各以名聞

二年十二月詔或才蘊廊廟器均瑚璉體王佐之嘉猷資公輔之宏量或奇謀異策決勝千里或投石拔距勇冠三軍或譽謬忠量志存規弼或繩違糾惡不避權豪或威惠仁明堪居牧守之重或公正廉直足膺令長之任咸宜搜訪具錄封進

調露元年七月詔或孝悌純至感於神明或文武兼資材堪將相或學藝該博業標儒首或藻思宏贍辭擅文宗或洞曉音律識均牙曠或深明曆數妙同京

管者咸令薦舉

永隆元年岳牧舉

武陟縣尉賀半千及第

則天垂拱四年十二月詞賦文苑科

房晉皇苗瓊王旦及第

永昌元年正月蓄文藻之思科

彭景直及第

抱儒素之業

科 李文尉及第

長壽三年四月臨難不顧徇節寧邦科

薛稷冠

證聖元年長才廣度沈迹下僚科

張河及第

萬歲通天元年文藝優長科

韓琬及第

神功元年九月絕倫科

蘇頌崔玄童袁仁敬何鳳孟兼禮洪子與盧從愿趙不欺

及第

冊時元龜

貢舉部

卷之六十四十五

十三

大足元年理選使孟詵試拔萃科崔翹鄭少微及第疾惡科

馮石及第

長安二年龔黃科馮克庵及第

中宗神龍元年二月詔九品已上及朝集使舉賢良

方正直言之士

二年二月令舉天下鴻儒碩學之士是年有才膺管

樂科張大求魏啓心魏倍盧絢張文成才高位下科

馮萬石昆良身張敬及第

三年材堪經邦科張九齡康元環及第賢良方正科蘇晉宋務光冠批盧

怡昌詢及第

景龍三年抱器懷能科侯銘及第茂才異等科王敬從盧重玄及第

睿宗景龍元年十二月制舉有能明三經通其大義

者能宗一史知其本末者通三教宗旨究其精微者

善六書文字辯其聲象者博雅造曲度知六律五音

者明韜畧學孫吳識天時人事者暢於詞氣聰於受

顧善敷奏吐納者咸令所司博采明試以聞

二年文以經國科袁暉韓朝宗及第藏名負俗科李俊文及第

太極元年二月命文武官五品以上各舉才堪軍將

及邊州都督刺史一人

玄宗先天元年十二月制令京文武官及朝集使五

品以上各舉堪充將帥者一人又有文經邦國科韓

及第藻思精華科趙冬曦寄以宣風則能興化變俗科

郭璘之道侔伊呂科張九齡手筆俊拔超越流輩科

杜昱張子斷張秀明嘗無

二年六月詔其諸州有抱器懷才不求聞達者訪名

聞奏

開元二年六月甲子制其有茂才異等拔萃超羣咸

令自舉其年有直言極諫科梁昇卿袁哲人奇士逸

倫屠釣科孫述良才異等科張

五年二月詔有嘉遁幽栖養高一仕者州牧各以名

薦是年有文史兼優科李昇期康允元文儒異等科

崔備褚廷六年博學通議科鄭少微蕭

七年文詞雅麗科邢巨苗晉卿褚思

九年正月詔曰諸州官人百姓有智合孫吳可以運

籌決勝有勇齊資育可以斬將奉旗或臨戎却寇堪

為一保之雄各聽自舉務通其實

十一年正月丁卯制其有沉淪草澤抱德棲遲並委

府縣搜揚

十二年將帥科

裴敦復房自謙及第

十五年二月制曰草澤中有文武高才者聽詣闕自  
舉是年應武足安邊科鄭昉樊高才沉淪草澤自舉

科鄧景山  
及第

十七年才高未達沉迹下僚科吳鞏  
及第

十九年博學宏詞科鄭昉陶  
韓及第

二十一年多才科李史魚  
及第

二十三年正月詔其或才有王霸之略學究天人之

際智勇堪將帥之選政能當牧宰之舉者五品以下

清官及軍將都督刺史各舉一人孝悌力田鄉閭推

稅者本州刺史長官各以名聞是年舉王霸科劉維  
綰及

第 智謀將帥科張重光崔圖  
李廣琛及第

二十七年正月制令諸州刺史舉德行尤異不求聞

達者

二月制草野間有殊才異行文堪經國者所由長官

以禮徵送

天寶元年正月一日詔有儒學博通及文詞秀逸或

有軍謀越衆或武藝絕倫者具以名薦是年有舉文

詞秀逸科崔明允顏  
真卿及第

六載風雅古調科薛據  
及第

十三載二月詔其博通墳典洞曉玄經清白著聞詞

藻宏麗軍謀出眾武藝絕倫者任自舉是年舉詞藻  
宏麗科楊綰及第

肅宗至德元年七月詔有直言極諫才能宰牧文詞  
博達武藝絕倫孝悌力田沉淪草澤聽詣闕自陳

二年十二月詔其有文經邦國學究天人博於經史  
工於詞賦善於著述精於法理軍謀制勝武藝絕倫

並任於所在自舉委郡守銓擇奏聞不限人數  
上元元年閏四月詔宜令中外五品以上文武正員

官各舉賢良方正直言極諫一人武藝文才俱堪濟  
理者亦任狀舉其或文乏詞策武非騎射但權謀可

以集事材力可以臨戎方圓可收亦任通策  
代宗廣德元年七月詔有懷才抱器安貧守節養素

丘園爲衆所知者具以名聞諸色人中有孝悌力田  
經術通博文詞雅麗政理優長各以名薦

永泰元年正月制孝悌力田懷材抱器遺逸未經薦  
達者各委州府聞奏親當策試

大曆元年十一月制天下有安貧樂道孝悌力田者  
具以名聞朕當親自策試

二年應樂道安貧科楊唐及第

五年六月詔内外文武官及前資官六品以下并草

澤中有碩學專門茂才異等智謀經武諷諫主文者  
仰所在表薦

六年諷諫主文科 鄭珣瑜李益及第

德宗以大曆十四年五月即位六月詔天下有才業

尤著高蹈丘園及直言極諫之士具以名聞諸色人

中有孝悌力田及以經學優深文詞清麗軍謀宏遠

武藝殊倫者亦具以名聞能詣聞自陳者亦聽

建中元年應賢良方正能直言極諫科 姜公卿元直樊澤臣元膺

及文詞清麗科 奚陟梁輔劉公亮鄭封吳通玄及第 經學優深科 孫毗黎逢

及第 季隨 高蹈丘園科 張紳衡良儒蘇哲及第 軍謀越衆科 夏后審平知和

鄭脩陵正周 孝悌力田聞於鄉閭科 郭黃中崔浩李牧及第

正元元年九月詔賢良方正能直言極諫第三等人

委中書門下即超資與處分第四等人即優與處分

第五等人即與處分是年舉賢良方正能直言極諫

科 韋執誼鄭利用穆質楊邵裴復柳公綽歸登李直方崔郊鄭敬魏弘簡沈迴元祿徐亮及第 博

通墳典達於教化科 熊執易劉簡及第 識洞韜畧堪任將帥

科 許贊及第

四年正月詔賢良方正直言極諫者高蹈不仕隱居

叢穴孝悌力田聞於鄉里所在長官具以名聞親當

策試是年四月應賢良方正能直言極諫科 崔元輪裴次元

李彝崔農史辛陸震柳公綽趙修徐弘毅清廉守節

政術可稱堪任縣令科李孝悌力田聞於鄉閭科張

及第

九年十一月制諸色人中有賢良方正能直言盡諫

或博通墳典達於教化或詳明政術可以理人者委

嘗參官及州府長史各舉所知當親策試

十一年十賢良方正能直言極諫科裴琦王潘朱諫

堯佐徐弘毅崔羣皇甫鑄王仲舒

博通墳典達於教化科朱頴詳明政術可以理人科

張平叔李景亮及第

十一年三月諸州准制薦隱居丘園不求聞達蔡茂

等九人並授試官令給公乘赴京到日量才叙用

憲宗元和元年四月才識兼茂明於體用科元稹韋

郁白居易曹景伯韋慶復崔瑄羅讓崔護薛達於吏

理可使從政科蕭睦

二年正月制天下諸色人中有賢良方正能直言極

諫博通墳典達於教化軍謀宏遠堪任將帥詳明政

術可以理人委內外官各舉所知當親自策試

二年四月賢良方正能直言極諫科牛僧孺皇甫湜

古弘宗徐晦賈餗王起博通墳典達於教化科馬苞

郭球姚袞庾咸及第貢舉部



軍謀宏遠材任將帥科樊宗師及第 達於吏理可使從政

利蕭陸及第

十四年七月詔諸色人有賢良方正能直言極諫博通墳典達於教化軍謀宏遠堪任將帥詳明政術可以理人者委內外官各舉所知當親自策試

穆宗長慶元年正月詔諸色人中有賢良方正能直言極諫博通墳典達於教化軍謀宏遠堪任將帥政術詳明可以理人者委有司各舉所知是年十二月

應賢良方正能直言極諫科嚴寵任晚呂述姚中立韋曙李回崔取崔龜從

韋正買崔知白詳明政術可以理人科崔郭及第 軍謀宏

遠材任將帥科吳思本丁商卿博通墳典達於教化科李思玄及

第

敬宗以長慶四年正月即位三月詔諸色人中有賢

良方正能直言極諫經學優深可為人師詳閑吏理

達於教化軍謀宏遠材任邊將者委嘗參官并諸道

節度使觀察諸州刺史各舉所知

寶曆元年四月賢良方正能直言極諫科唐伸楊儉韋端符舒

元哀蕭敏楊魯士來擇趙祝裴暉韋繇李昌實嚴封李涯蕭夷中馮球元晦及第詳明吏理

達於教化科韋正貫軍謀宏遠材任邊將科樊肅侯平章及

第

文宗太和元年正月制諸色人中有賢良方正能直言極諫者及經學優深可爲師法詳閑吏理達於教化軍謀宏遠堪任將帥者皆參官及方牧郡守各舉所知無人舉者亦聽自舉

二年閏三月賢良方正能直言極諫科

裴休裴素李

并牧馬維鄭亞崔博崔興王式羅邠京崔

詳明吏理

達於教化科

宋昆及第

軍謀宏遠堪任將帥科

鄭元李式及第

開成元年正月制其有藏器俟時隱身巖穴奇節獨行可激風俗者各以名聞

梁太祖開平三年制其有卓犖不羈沉潛用晦負王

霸之業蘊經濟之謀究古今刑政之源達禮樂質文之奧機籌可以制度經術可以辯疑旋具奏聞然後試其所長待以不次

四年九月詔如有卓犖不羈沉潛自負迺王霸之上畧達文武之大經究古今刑政之源達禮樂質文之變朕則待以不次委以非嘗

後唐明宗天成二年四月中書奏尙書禮部貢院申當司奉今月六日勅吏部流內銓狀據白院狀當司先准禮部貢院牒據成德軍解送到前進士王蟾狀請罷攝梁州司功參軍應宏詞舉前件人唯格例應

重科合在吏部其王蟾弁牒解送吏部請准例指蹤  
者當司具狀申堂奉判送吏部分拆近年事例如何  
者伏緣近年別無事例今檢登科錄內爲僞梁開平  
三年應宏詞科二人前進士余滢承旨舍人李忌考  
官二人司勳郎中崔景兵部員外郎張貽憲者再具  
狀申堂奉判送吏部准例指揮者其前進士王蟾應  
宏詞考官試官合在流內銓申請者前進士王蟾請  
應宏詞伏自近年已來無人請應今詳格例合差考  
官二人又緣只有王蟾一人獨應銓司未敢懸便奏  
請差官者奉勅宜令禮部貢院就五科舉人考試者

伏以舉選公事皆有格條准新定格節文宏詞拔萃  
唯長慶二年格吏部差考試官二人與知銓尙書侍  
郎同考試聞奏又准格節文內准太和元年十月二  
十三日勅應禮部諸色貢舉人及吏部諸色科目選  
人凡無出身及未有官只合於禮部應舉有出身有  
官方合於吏部赴科目選其請應宏詞舉前進士王  
蟾當年放及第後尋已闕送吏部訖若應宏拔例得  
南曹判成卽是科選選人事理合歸吏部况緣五科  
考試官只考學業難於同考宏詞者奉勅王蟾宜令  
吏部准往例差官考試

長興元年八月三日尚書吏部奉據禮部貢院牒送  
到府試請應書判拔萃前號州盧氏縣主簿張岫親  
書紙內對六節判肆通二粗唯例及第五上等其所  
試判今錄奏聞奉勅宜令所司今後吏部所應宏詞  
拔萃宜並權停

周世宗顯德四年十月制曰制策懸科前朝盛世莫  
不訪賢良於丕陋求讜正於箴規殿庭之間帝王親  
試其或大裨於國政有益於時機則必待以優恩縻  
之好爵拔竒取異無尚於茲得人者昌於是乎在爰  
從近代久廢此科懷才抱器鬱而不伸隱耀韜光者

晦而莫出遂使翹翹之楚多致於弃捐皎皎之駒莫  
就於縻繫遺才滯用闕孰甚焉應天下諸色人中有  
賢良方正能直言極諫經學優深可爲師法詳閑吏  
理達於教化者不限前資見任職官黃衣草澤並許  
應詔其逐處州府依每歲貢舉人試例差官別考試  
解送尚書吏部仍量試策論三道共三千字以上當  
日內成取文理俱優人物爽秀者方得解送取來年  
十月集上都其登朝官亦許上表自舉時兵部尚書  
張昭上言請興制舉於右是命

